

ASO GAFUA, 27 IANUARI 2020

Na nofoia e le Fofoga Fetalai le Nofoa i le itula e 9:04 i le taeao.

Tatalo.

FOFOGA FETALAI: Ou te toe faasilasila atu ua toe amatalia Taualumaga ma Galuega a le Fono Aoaofaitulafono. I le faaaloalo ou te faatalofa atu ai i le paia maualuga i lenei taeao i le paia o le Fonotoa ma le Fonousu a le atunuu i lau Afioga i le Palemia, le Sui Palemia ma le Aiga Kapeneta, faapea foi sui usufono mamalu o le Palemene, faapea foi le paia maualuga i Ofisa Sili o Pulega o Matagaluega ma Faalapotopotoga a le Malo.

E faatalofa atu foi i lau tapuaiga Samoa e amata mai i ona ao seia oo i ona iu. Malo faafetai ua maua le avanoa e faaauau ai le matou galuega, ia tapuai maia ma le manuia.

ISI FAASILASILAGA A LE FOFOGA FETALAI

FOFOGA FETALAI: Mo le silafia e le mamalu o le Palemene, e tusa ai ma le lafo na faatuina e le Afioga i le Palemia i le aso Fono Aso Faraile 24/1/2020, ina ia faataatia e le sui usufono mo Gagaifomauga Nu.3 Pepa Faamaonia o le faatauina o lana afi (generator) lea na taua e faapea e \$100,000 (Samoa) lona tau. O le avanoa lenei ou te tapa ai lau Afioga i le sui usufono mamalu mo Gagaifomauga Nu.3 ina ia tuuina mai kopi faamaonia i le Susuga i le Failautusi o le Fono Aoaofaitulafono mo le faataatiaina i le Laulau a Fono a le Palemene. O pepa faamaonia e pei ona tapa.

Susuga Hon LAAULI POLATAIVAO LEUATEA (Gagaifomauga Nu.3): Lau Afioga i le Fofoga Fetalai, i le ava ma le migao e tatau ai i lenei taeao fou, ae ou te le i tuuina atu le faamaoniga o pepa ma mea uma na poloaiina ai au e lau Afioga ma le Palemene o Samoa e ala foi i le lafo faatu a le Afioga i le Palemia, na o sina avanoa lava ina ia faapulapula ma ia manino lelei pepa o le a tuuina atu.

Lau Afioga i le Fofoga Fetalai i lou ava ma lou faaaloalo tele i le alafai mai i faguga lelei i lenei taeao fou lau Afioga i le Fofoga Fetalai aemaise sui usufono mamalu o le Palemene. Afifio foi le Afioga i le Palemia ma

lana Kapeneta, aemaise o le taputapu mai o le mamalu o si o tatou atunuu i ona vaega eseese. Faafetai i le Atua ua tatou aulia lenei aso fou.

I lou ava ma lou faaaloalo tele lau Afioga i le Fofoga Fetalai, e tusa ai ma Tulafono Tumau ina ia tumau le mamalu ma le maualuga o ona faiga faavae ma le aloaia ma le usitaia, ou te manatu ai i lenei taeao fou ou te tuuina atu ai ma le aloaia e ala i le lafo faatu sa ioeina e le Palemene lenei, o faamaumauga uma ua fesiligia ai lou faamaoni i upu ma tala sa ou tuuina atu e tolaulauina ai le fesoasoani a lenei itumalo e ala i le lauiliuina o le Tala o le Tupe. O lea ua ou tapenaina le tusi atoa lau Afioga e momoli atu ai faamaumauga aloaia o le faatauina o le afi i ona vaega eseese aemaise foi o le faataunuina o le momoliina mai i totonu o le tatou atunuu. Lau Afioga i le Fofoga Fetalai, o le tau atoa i le update quote na tuuina mai, e \$72,210.00, faatupeina lea i totonu o le taumafaiga a lenei aiga. Ma na taunuu mai le afi na faagaoiina uma e le kamupani o le freight plus i Vailoa Faleata, ma o le Afioga lava i le sui usufono sa nafa ma le kilivaina ma le kiliaina o lenei afi moli ma momoli atu i le kamupani sa okaina.

E leai lava se lagona lau Afioga i le Fofoga Fetalai ou te faia se talaole pe faalata le Maota Fono. O le agaga e tuuina atu ina ia malamalama ma faataatia i lagatonu lenei mataupu. Ua ou tuuina atu ai ma lou faaaloalo le kopi lau Afioga i le Fofoga Fetalai, kopi le Afioga i le Palemia ma le 50 kopi mo sui usufono uma o le Palemene mo le silafia. E tatalo atu ai ma le agaga faaaloalo lau Afioga i le Fofoga Fetalai, afai e tefa le tauala i lou finagalo e tulituliloa ma tuliaupu le faamaoniga o au upu, ou te tatalo atu ai ina ia taatia i lagatonu. Ou te tatalo ma le loto maualalo ina ia faatuina se lafo, ina ia tapa foi faamaumauga na saunoa i ai le taitaifono e ala i quotes ia e tolu, ina ia tuu mai i le Laulau a Fono e faataatia i lagatonu e saili i ai le amiotonu o le mataupu lenei.

O le lafo lena lau Afioga i le Fofoga Fetalai, ma ou te tuuina atu ai ma faamaumauga mo le silafia e le Maota. Ma lou agaga faaaloalo.

Susuga Hon TUILAEPA AUUEA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI (Palemia): Lau Afioga i le Fofoga Fetalai, o le tulaga lea ou te tulai atu ai, e faatu le lafo, *Ina ia faasee i le Komiti o Tupe ia pepa nei ua aumai mo le latou iloiloga.*

I le faatuina o le lafo i le vaiaso talu ai, e le i faapaole ona fai ona e tatau ona matua manino lelei ia au ma le Kapeneta lenei ma le Palemene atoa aua o lea ua fofoga i luma o le Palemene lenei. O le faiga faavae lea e i ai a le tatou Malo, e faasalalau mea uma, tauofo. E mafua ona tauofo, ona ia aua lava ne i i ai ni mea faaalatua. O le ala lea e tauofo ai mea nei a le tatou Malo. Ua manino foi le faasilasilaga a le Taitaifono o le Komiti o Tupe sa ia taua ai e tauofo, ma o le tau lea e aupito sili ona taugofie. E le o iloa tonu, e tele mea ia e le o iloa. E le o iloa po o le a le tele o le afi, le malosi, e le o iloa po o se afi fou lea e talanoa mai ai le sui usufono po o se afi tuai,

second hand. E tele lava mea ia e le o iloa e le Maota lenei e tatau ai ona silasila i ai le Komiti, ae po o ai foi le kamupani lea na nafa ma nei mea, po o se kamupani o se uo, ae pe sa auala mai foi i le tulaga masani mai le Customs, ae pe sa totogi foi se tiute, ae po o le tau foi lea na ave i tai e totogi ai le tiute. Ma o mea uma ia e toe siaki foi e le Tiute i le kamupani na aumai ai le afi lea po o le tau sao lea na aumai ai, ona o le tulaga lenei lau Afioga, e oo mai nei o lea o lo o tupu lava ma o lo o fai ma trace le tatou Matagaluega o Tiute, e i ai le aufaioloa e aumai, e o aumai oloa mai fafo, supplier, e o atu foi isi aumai latou oloa mai le supplier lava e tasi ae aumai o le tau lava e tasi, ae aumai pepa ia na aumai, e eseeese tau, e maualuga le isi ae maualalo le isi.

Lau Afioga i le Fofoga Fetalai, o le tele ia o lavelave o mea faapenei e tatau ai ona matua silasila lelei le Komiti faatasi ai ma le Matagaluega o le Tiute ina ia sao lelei mea nei aua ne i i ai se tulaga faaletonu. O lea foi e taoto i le faamasinoga nisi foi mea faapea e aumai e **fraud** e solitulafono pepa nei. O le mea la lea e matua taua ai leaga ina ua aumai le faasilasilaga i le vaiaso talu ai, na tupu ae ai le masalosalo ia te au ma le Kapeneta, po o sao le amio a le Minisita po o sese. E le faapea la o masalomia le faamatalaga a le sui usufono na aumai, ae ua amata ona faatupu masalosalo i le Minisita po o sao nei mea. Ae ua tau fai ifo la i lalo ma faatoatoa malie le masalosalo lea ona o le tautinoga a le Taitaifono a le Komiti o Tupe, ua uma ona latou vaai i ai i mea nei, sa alu lava i luga o faiga faavae a le tatou Malo i le tauofoga o mea. O lea la e tauofo ai, ona o le isi lena Tulafono o mea o faigamalo e faavae i le amiotonu ma faasalalau faalauaitele a tatou galuega ina ia aua ai ne i i ai ni uiga faaalatua e tulai mai.

Lau Afioga, o le aoga tele o le mataupu lenei ina ia toe faamanatu ai i sui usufono o le Maota ona o lea e fai ma agai mai i Minisita. O le mea e agai i ai le fesili, o le Taitaifono o le Komiti o Tupe i le tulaga lea o le tuumavaevae o galuega a le Palemene lenei. O le Malo lea e faatinoina galuega, a o le Komiti, o latou o sui usufono o le Palemene, latou te siakiina galuega o lo o fai e le Malo. Na o le pau la le mea o lo o agai i ai fesili, e agai tonu lava i le Taitaifono o le Komiti ma le latou Komiti o Tupe, ina ia maua ai le tulaga o le tutoatasi. O o i le Taitaifono o le Komiti o Tupe ma Taitaifono foi o isi Komiti, o i latou ia o sui usufono o le Palemene i lona tulaga aoao e aumai ai le mea amiotonu. Ae le o le agai mai i i. O matou lea e nonofo atu i i, o matou lea e faia le gaoioiga ia. O le galuega a le Komiti o Tupe, o le siaki mai o matou po o sao mea ia e fai. O lona uiga, e aoga tele sui usufono o le Palemene, aua le agai mai i i ae agai i o i le Taitaifono. E pei o le a outou le amanaia le Taitaifono ma le Komiti o Tupe.

E 31 tausaga talu ai lau Afioga i le tausaga e 1989, sa ou faatu ai le lafo i i a o ou Minisita o Tupe e faatu le tatou Tulafono e faaaloaia ai se fuafuaga au i luma a le tatou Malo e faatu ai le Komiti o Fale, ina ua tulai mai le vevesiga ia o le suiga o le tau, e tua i ai o tatou tagata nai lo le tau o i le

faletupe o fefaatauaiga e tai pei o le ANZ, e faigata tele ona maua mai ai ni nogatupe mo le fausia o ni fale. Ona tupu mai ai lea o ni manatu i le Palemia ma le Kapeneta i lena taimi, o le a faatu se tatou Faalapotopotoga o Fale e tua i ai le toatele o le tatou atunuu, aemaise lava nonogatupe e alu atu lava i lalo po o le 3, 4, 5,000 e agai lava i luga i le 30,000 e fia fau ai ni fale, ae le mamafa tele mea o aiaiga e pei ona faia e faletupe. O lea la ou te fia faamatala atu le Tulafono ae tutu mai le sui usufono mo Anoamaa Sasae ma lafo mai ni upu malolosi o mea taufaavalea, o mea pepelo uma nei, e leai se Faalapotopotoga o Fale e faatuina. E faatolu lava ona ou tu atu i luga ma taofi mai, ia, ai la o tilotilo mai le sui usufono o lea e soisoi le Palemia, ona liliu mai lea lafo mai ni upu malolosi i le Palemia ona faatu ai lea o le lafo, faaluaina e alu e sue mai faamaumauga e lagolago ai lana mau, tuu foi i ai le 48 itula. E uma le 48 itula ae sau faatoese mai iinei ua le mafai ona maua ni faamaumauga, faatu ai lava ma le lafo ma faaluaina, faatea ma le Palemene lenei. Na tea ai lava ma le Palemene lenei, na avanoa ai lava le nofoa o Anoamaa Sasae.

Lau Afioga i le Fofoga Fetalai, e le mama le mataupu lenei, ae oooo lava le suesuega i vaega uma ia sa ou taua, ma e oo lava i o i le kamupani na latou fausia le masini lea ma tilotilo po o le a le malosi. O le a le malosi, ae po o se second hand foi, ae pe sa totogi foi ni tiute, ae pe sao foi le tau na aumai. Afai na totogi le tiute, ae pe sao foi le tau na aumai ai.

Lau Afioga i le Fofoga Fetalai, o mea na. A o le mea lea ou te ofo ai, o le le tauofo o lea foi tagata i lena tau taugofie, a o lea sa tauofo mea ia. O le a la le mea na le tauofo ai i lana \$100,000? Lau Afioga i le Fofoga Fetalai, ou te faatu atu le lafo, *Ina ia faasee atu Pepa uma nei na aumai i le Komiti o Tupe mo lana iloiloga ma toe lipoti mai ai i le isi a tatou Fonotaga.*

Faaluaina e Minisita o le Kapeneta.

Na faamaonia le lafo.

Susuga Hon Laauli Polataivao Leuatea: Lau Afioga i le Fofoga Fetalai, sina avanoa lava pe talafeagai ai ma lou finagalo, malie lau Afioga e leai se agaga ou te toe paopaina le lafo ua uma ona faatu. E saolele le lafo a le Afioga i le Palemia. Na pau lava o lea, o le fesiligia o lou faamaoni ma le faamaoni o le Komiti o Tupe. Na pau lava lenei lau Afioga, afai nei o le mataupu lea o le a toe ave i lima o i latou o lo o finau mai foi i lau finau atu, ona le amiotonu lea o le mataupu lenei. Ou te tatalo atu i lau Afioga i le Fofoga Fetalai, fili se Komiti o Amio Tualoa a le Palemene latou te omai e iloilo le mataupu lenei. Afai nei o lea o le a tuulafoai i lima o i latou o lo o finau mai e sao latou, lau Afioga o lau tatalo lena ma le agaga faaaloalo. Afai ua fesiligia lou faamaoni, o lea foi ou te fesiligia le faamaoni o pepa ia. A o le saunoaga a le Palemia, o lea ua ou fai atu, o

pepa uma na faatonu ai au e avatu, o lena ua i ina le tali ma lou agaga faamaoni. A o le tuu o le mataupu lenei i le Komiti o Tupe, ou te tatalo atu lau Afioga i le Fofoga Fetalai, e le talafeagai.

FOFOGA FETALAI: Ua maua atu lou finagalo. Malie le sui usufono mamalu mo Gagaifomauga Nu.3.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, e le o iinei foi tuivalea. O le Komiti o Tupe o le latou matafaioi tonu lava lea o le suesue o mea faapenei e aafia ai tupe a le Malo.

Lau Afioga i le Fofoga Fetalai, o lea e sao le lafo.

Susuga Hon Laauli Polataivao Leuatea: Lau Afioga i le Fofoga Fetalai, e i ai lava le matega. E ava atu i lau Afioga i le Fofoga Fetalai, e le amiotonu le mea lea o le a fai.

FOFOGA FETALAI: Ua ou faamuta le avanoa o le sui usufono. Se i ou fai atu... ua ou fautua atu mo le faaiuga. O lea ua pasia le lafo ma ua faapena ona tuuina atu pepa i le Komiti. Ae mo le silafia e le i feteenai lou finagalo ma le finagalo o le Komiti. O lo o tetee lou finagalo i le faaaliga a le Komiti ma le latou suesuega e pei ona tuuina mai i le Lipoti ma le Tala Faaopopo. Na oo i ai le latou saililiga i mea uma pei ona aumai i le Tala Faaopopo ma ua faapena ona faamalieina le finagalo o le Komiti. Ae o lou finagalo sa tetee i le Komiti, e leai la se mea faapea o fai ai se feteenaiga a le Komiti ma lou finagalo. O lou finagalo o lo o tetee i le faaaliga a le Komiti, a o le Komiti o lo o faagasolo le latou galuega e tusa ai o latou tiute. O le mea la lea e faamalulu atu ai, e faitau eseese Tutuila ma Ape e pei o lea mataupu.

Susuga Hon Laauli Polataivao Leuatea: Lau Afioga i le Fofoga Fetalai, e sa ia te au ona ou faia se tulaga e toia ai le va. O lau mau lau Afioga i le Fofoga Fetalai, o lea ou te fesiligia. O le a toe ave la i lima o le Komiti o latou lea na tapa lipoti nei pe sao pe sese? Malie lau Afioga o le tagi a le pumate ma lau tatalo na o au lea e tautaualemau, malie lou finagalo, afai e amiotonu, fai le Komiti o Amio Taualoa e ave i ai au ma mea ia a le Komiti.

FOFOGA FETALAI: Ia ua ou fesoasoani atu. O lea ua toe tulai mai le isi sese. O le isi sese, e le i faatuina mai pe na mananao le Komiti o Tupe e tapa ni faamaoniga. E leai. O le faaiuga lena o le amiotonu ma o tatou Tulafono Tumau lena. O le Tulafono Tumau lena o lea ua faatu mai ai le lafo e le Palemia. O a tatou Tulafono Tumau a saunoa le sui usufono mamalu, e saunoa i mea e mafai ona faamaonia. O lea la ua faatulai mai le

lafo e le Palemia, a o le tatou Tulafono Tumau e afua mai ai le lafo lea, ae le i faatuina mai e le Komiti o Tupe. O le mea la lea, ou te faamalulu atu, o lea lava tatou te o i le faagasologa o tatou galuega i a tatou Tulafono Tumau. Ne i faitau sese mai le Atua faapea, o ai ua afisi a o ai ua faasavali. E leai, o faiga faavae lena a le tatou Palemene o lea foi sa e tiu ai i le lima tausaga talu ai. O le mea la lea ou te faamalulu atu i le sui usufono mamalu, e moni a oe.

Susuga Hon Laauli Polataivao Leuatea: Ioe, lau Afioga i le Fofoga Fetalai, se ou te tatalo ma lou agaga loto mauualalo. O lea na faatu lata lafo. Aua o pepa nei e le oo mai i lumamea, o lea na faatu lata lafo, na faataatia i luma i i mea ia na saunoa i ai le Taitaifono. Toleafoa, o le agaga ma le faaaloalo.

FOFOGA FETALAI: Ia, se i ou... Faafetai. Se i ou tali atu, e leai se malosi o i le tatou Tulafono Tumau, ma e leai foi se vaega o i le Tulafono Tumau e fesiligia ai ma tapa e se sui usufono se faamaoniga a le Maota o le Palemene. Ia a faamaonia foi o le tatou Palemene? O lea foi ua manino le saunoaga a le Palemia, o le Komiti o Tupe po o le a lava le Komiti. Po o le Komiti o Tulafono po o le Komiti o Tulaga Taualoa, po o le a lava le Komiti, o le Komiti lena a le Palemene. O le mea la lea ou te faamalulu atu ai i le sui usufono mamalu...

Susuga Hon Laauli Polataivao Leuatea: Ua ou ava atu, o le a tuu atu i le Atua le mataupu.

FOFOGA FETALAI: Faafetai. Ia se i tulai mai le sui usufono mo Palauli le Falefa.

Afioga Hon Faumuina Tiatia Faaolatane Liuga (Palauli le Falefa): Faafetai. Ia ona o au le sui usufono o le Komiti lea e taua, leaga o lea ua tuuaia matou... O le Afioga i le sui usufono sa Fofoga Fetalai. O le Tulafono Tumau e 172, e manino lava ma malamalama matafaioi a le Komiti o Tupe, o mea tau tupe. Talu ai o lea na oo mai le Lipoti ia matou ma ua uma foi ona aumai le matou lipoti o lea ua i lumamea o le Palemene ma ua pasia. O le fesiligia o le faamaoni e le Afioga i le sui usufono mamalu, ou te iloa e le taugofie foi lana tuuaiga faapea o lea o le a aumai i le Komiti e le o i ai se amiotonu. Na o le Atua e i ai lana amiotonu, ma o le amiotonu foi lena o lea tatou te tausisi i ai. Ou te faamalulu atu i le sui usufono, e leai e le o iinei Tuivalea. A aumai foi le lipoti e aofia ai ma pepa ua faataatia nei ona o le lafo a le Malo, ia o le a silasila lava i ai le Maota, ma e leai lava se mea e tanumia, e faalia lava mea uma lau Afioga.

FOFOGA FETALAI: Malo faafetai.

Susuga Hon Laauli Polataivao Leuatea: Lau Afioga ua ou toe tulai atu lava sa agai lau mataupu i le Taitaifono. Faumuina, mafaufau i lou taimi, mafaufau i lou taimi, o le agaga lena o lea e popoe ai leaga o lea tou te saofafai uma i totonu o le Komiti o Tupe.

FOFOGA FETALAI: Ia, malie le sui usufono, tatou te le fetaai i tulaga faapena ne i... a o upu faapaamata, o le tatou toe foi lena i tua e faauo i le faamisa. Ioe, e pei e faapena se lagona. E i ai foi le avanoa o le Taitaifono ia ma le Komiti e tapa ai foi le Matagaluega o Falepuipui latou se i aumai foi le tulaga o le faapupulaga o latou foi mataupu. O le lafo lava e faapitoa i le faamaoniga o lau saunoaga, o lea ua taoto, o lea ua tuuina mai o lea ua lafo i le Komiti, ia o le a saili foi i ai so latou finagalo. A fai atu lava e faamaonia, ia o le a le mea o le a e popole ai pe afai e moni ma faamaonia au saunoaga ia e aumai? Ae ala ona pei e foliga ua e tau nervous ona pe i ai ni tulaga faaletonu o mea ia aua e... o ita foi ia ta te faatau generator foi ita, lea faatoa tolu nei masina talu ona faatau nei le isi generator. Ta te iloa lelei lava le tau o mea, ae ta te le pisa. Ae ui i lea, lafo ia i le Komiti ma le Taitaifono.

Susuga Hon Laauli Polataivao Leuatea: Faafetai i lau Afioga, ua foi se lagona.

FOFOGA FETALAI: Ia, se i tuu atu lava le avanoa i le Taitaifono o le Komiti.

Afioga Aliimalemanu Alofa Tuuau (Alataua Sisifo): Faafetai i leni taeao fou. Ia taatia maia le mataupu o le a iloilo e le Komiti. Na pau lava le mea e fia faamanatu atu pea i sui usufono mamalu o le Palemene, o le Tala Faatatau le mea lea ta te talanoa i ai, o mea o matematega po o mea e le i tutupu, o le plan. A o le mea lea, seiloga lava e taunuu. Afai lava o lea e \$300,000 ae uma ane na o le \$260,000 ina ua uma lava ona fai atoa, na o le pau lava lena o le tupe e alu i le Tala o le Tupe. Ae afai lava e uma ae e \$310,000, ia o lena foi. Ae pei na o se matematega po o se plan i mea o le a tutupu, o lea sa i ai quotes ia sa aumai e le falepuipui e tau fua i ai le fuainumera e ave i lalo. Ae o le a lipoti atoa mai lau Afioga e faatea ai lea mataupu. Ma le faaaloalo lava.

Afioga Faumuina Asi Pauli Wayne Fong (Nuu Tu Taulaga Sisifo): Lau Afioga i le Fofoga Fetalai pe maua se avanoa...

FOFOGA FETALAI: E leai e le maua se avanoa.

Afioga Faumuina Asi Pauli Wayne Fong: E leai, na ona ou fia tali atu lava i matematega lea e sau i i lau Afioga, o matematega a le Komiti o Tupe.

FOFOGA FETALAI: Malie lau Afioga, o lea ua ou faamalie atu Faumui, e tatau foi... Faafetai tele lava, o le tatou galuega e faapena, e fai foi o le faapalepale atu o le Nofoa, ae ia outou alolofa e faautagia mai leaga e toatele outou ae na o au. E le o maua foi le malosi, ne i te i le tatou Fono ua valaau se ambulance talu ai lo outou faafinau tele i le Fofoga Fetalai. Faafilemu masalo pe toe pau lenei o le tatou aso Fono po o taeao ona uma lea pe afai e sologa lelei saunoaga a sui usufono mamalu.

Talu ai o lea ua taoto i paga le tulaga o lea mataupu, tatou talia le tulaga o le amiotonu ma faatino le tatou galuega. E leai se mea e atugalua ai lau Afioga i le sui usufono mo Gagaifomauga Nu.3, tatou faapena ona fai.

TUUIINA ATU O PEPA

Na tolaulauina e le Failautusi i le Fono Aoa le faasologa o Pepa e tusa ai ma T.T.49(2).

1. P.P.2019/2020 Nu.156, Lipoti Faaletausaga a le Pulega o Felauaiga i le Lauelele mo le tausaga faaletupe 2018/2019.

LAFO A LE AFIOGA I LE SUI PALEMIA

FOFOGA FETALAI: Ma lou faaaloalo ou te tapa lau Afioga i le Sui Palemia.

Afioga Hon FIAME NAOMI MATAAFA (Sui Palemia, Minisita mo Punaoa Faalenatura ma le Siosiomaga): Faafetai mo le avanoa lau Afioga i le Fofoga Fetalai. I le alafai mai i faguga lelei i lenei taeao o sui usufono o le Fono Faitulafono a Samoa, ou te tulai atu ma le faaaloalo, malo le usufono i le lagi e mama ma le soifua manuia.

Lau Afioga i le Fofoga Fetalai, ua ou tulai atu ona o le Tulafono o le Komisi Faufautua o Fanua faaleaganuu 2013. Toe o nai masina ona faaleaogaina lea pe a maea le 7 tausaga. Peitai o lo o aiaia i lalo o le fuaiupu 14(2) e faapea: E mafai e le Fono Aoa Faitulafono a o lumanai ona faamutaina le 7 tausaga, e ala i se iugafono ona faaopoopo gaioioiga a le Komisi mo se vaitaimi faaopoopo e le silia le 7 tausaga. O le mea lea ou te faatu ai le lafo, *Ina ia faamaonia e lenei Fono Aoa Faitulafono le toe faaauau o le Komisi mo le isi 3 tausaga e pei ona i ai le faamaoniga a le Kapeneta (FK (19) 39 aua nisi gaioioiga e fia faamaea.*

Faaluaina e le Minisita mo Tina ma Tamaitai, Atinae o Nuu ma Afioga ma Agafesootai ma le Minisita mo Pisinisi, Alamanuia ma Leipa.

Na faamaonia le lafo.

LAFO MO LE FAATAATIAESE O TULAFONO TUMAU

FOFOGA FETALAI: Ou te tapa ma le faaaloalo lau Afioga i le Palemia.

Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr.

SAILELE MALIELEGAOI: Lau Afioga i le Fofoga Fetalai ona o le taua tele o le Tulafono leni, o lea ou te faatu ai le lafo, *Ina ia faataatiaese Tulafono Tumau 102(1) e avanoa ai le faitauga faalua o le Tulafono leni ma faagasolo ai lava seia faitauina faatolu.*

Faaluaina e le Sui Palemia ma Minisita o le Kapeneta.

Na faamaonia le lafo.

TULAFONO TAU FAAOFI O TEUTEUGA O LE TULAFONO O LE PULEGA O TUPE A LE MALO 2019 – faitauga faalua

FOFOGA FETALAI: Ou te tapa lau Afioga i le Minisita o Tupe.

Afioga Hon SILI EPA TUIOTI (Minisita o Tupe): Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o le Pulega o Tupe a le Malo 2019 i lona faitauga faalua ma ou te fia tautala faamalamalama i ai.*

Faaluaina e le Minisita mo Aoga ma le Minisita mo Tupe Maua.

FOFOGA FETALAI: O le avanoa leni ou te tapa ma le faaaloalo lau Afioga i le Minisita mo lau saunoaga faamalamalama.

Afioga Hon SILI EPA TUIOTI: Lau Afioga i le Fofoga Fetalai faapea foi le mamalu o sui usufono. E puupuu lava le suiga leni e toe teuteu ai le Tulafono Tau Faaofi, ona o le faaopoopoina lea i ai o le tatou Faalapotopotoga o le Afaipisinisi ma Alamanuia o Samoa, po o le **Chamber of Commerce**, e avea ai ma se tasi sui o le tatou faalapotopotoga o le National Revenue Board. O le taimi leni, e na o

Matagaluega o le Malo o lo o i ai i totonu o lenei komiti. O lo o taitaifono ai le Ofisa Sili o Pulega o le Matagaluega o Tupe faapea le Loia Sili a le Malo, o lo o i ai ma le Ofisa Sili o Pulega o le Ofisa o Tiute ma Tupe Maua, faapea le pulega o le Matagaluega o Pisinisi Alamanuia ma Leipa.

O le teuteuga lenei o le tatou Tulafono e mulimulitai lea i le faaiuga a le Kapeneta, ua tuu atu ai le avanoa i le Aufaipisinisi ma Alamanuia o Samoa, le Chamber of Commerce e avea i latou ma sui o lenei Komiti. O le taua o lenei Tulafono ina ia faapea ona faamausali ai le paaga a le Malo ma ana Matagaluega, ma le Faalapotopotoga lenei a le Aufaipisinisi ma Alamanuia o Samoa, ua tele tausaga o lo o fai ia fesootaiga ma talanoaga aemaise lava i taimi e tapena ai le Tala o le Tupe. E fia maua foi pe o le a se sao o vaega tumaoti i tulaga o faiga faavae po o tulaga foi i le faasoasoina o seleni, i tulaga e tatau ona ave i ai le faamuamua. O le Faalapotopotoga lenei a le Aufaipisiniai ma Alamanuia o Samoa, o le Faalapotopotoga lenei e pito sili ona toatele i totonu o le vaega Tumaoti, e ese mai i le vaega a le augaosi oloa faapea foi ia le vaega o lo o faatinoina le atinae o a tatou turisi. O le faalapotopotoga foi lenei o lo o i ai uma lava sui o isi faalapotopotoga ia, o le mea lea ua manatu ai le Malo, ua tatau ona tuu atu loa ia maua le avanoa e auai faatasi lenei Faalapotopotoga i totonu o le Komiti faatino o tupe maua po o le National Revenue Board. Lau Afioga e puupuu lava lenei suiga, ma ua oo foi i le taimi ua talafeagai ona faamalosi lenei paaga a tatou o le Malo ma le aufaipisinisi. Ina ia faapena ona tatou galulue faatasi, aemaise lava foi i le vaaiga mamao i luma i lenei taimi o le tatou **20/40 strategy**, e tatau lava ona tatou faasoa i Matagaluega ma le Malo faapea le aufaipisinisi, o i latou o lo o faia le tele o galuega maua ai foi avanoa faigaluega o le atunuu, ua tatau ona tatou galulue faatasi.

O le isi suiga lau Afioga e faapito lava lenei suiga i le auai lea o le Peresetene o le Faalapotopotoga o le aufaipisinisi. Ma o lo o manaomia foi i lalo o le Tulafono, e le mafai ona fai ma so o se isi e fai ma sui o le Faalapotopotoga po o Matagaluega o lo o i totonu o lenei Komiti. O lona uiga afai e le mafai ona auai le Ofisa Sili o Pulega, po o le Peresetene o Matagaluega po o le Peresetene foi o le Chamber of Commerce, o lona uiga e tatau ona sau se tagata i lalo ifo, a le o le ACEO po o le Deputy CEO o Matagaluega. O se sui sinia foi i totonu o le Faalapotopotoga a le Aufaipisinisi ma Alamanuia Samoa. O le faapuupuu atu lena o le faamatalaga e tusa ma lenei Tulafono Tau Faaofi o Teuteuga o le Tulafono o le Pulega o Tupe a le Malo 2019.

FOFOGA FETALAI: O nei foi Tulafono o Teuteuga sa lava foi se taimi o faamalamalama i le tatou semina. E i ai foi le manatu ua lava lelei le silafia e sui mamalu e tusa ai o lenei mataupu. O le mea lava lea, o le a tuuina atu le fesili.

Afioga SULAMANAIA FETAIAI TAUILILI TUIVASA: Lau Afioga i le Fofoga Fetalai, e fia maua se avanoa o lenei itumalo.

FOFOGA FETALAI: Masalo e pau lea o le itumalo o lea e fia saunoa i le...saunoa le sui usufono mo Vaimauga i Sasae.

Afioga SULAMANAIA FETAIAI TAUILILI TUIVASA: E muamua ona faatalofa atu foi ma faafetai atu i lau Afioga i le Fofoga Fetalai, aemaise le sui Fofoga Fetalai i le taitaiina o le Fonousu a le atunuu. O lea ua matau atu i lenei taeao o lea ua toe amatalia lenei vaiaso o la tatou Fonotaga, o lo o maualuga pea le taitaiina o lenei Fonotaga e ala i lau Afioga ma le sui Fofoga Fetalai. Faafetai foi lenei itumalo i lenei itu o le Maota, le Afioga i le Palemia ma le Kapeneta ma sui usufono, ona o le tali mai foi i lenei itu i le vaiaso ua tuanai. O le agaga faafetai lea o lenei itumalo, o lea ua manino le faafofoga a Samoa, ona o le tali malamalama mai i mea sa fia malamalama i ai lenei itumalo.

Ao lenei itu e fia fai se sao o lenei itumalo. Ou te faafetai i le Minisita aemaise foi le Ofisa Sili ma le Matagaluega o le Malo, e aumai pea Tulafono i totonu, e teuteu ai o tatou Tulafono, ina ia faafaigofie ma matagofie le galueaina o si o tatou atunuu aua le tamaoaiga. O le agaga e fia avatu e lenei itumalo o le agaga lea o le Peresetene ia o Faalapotopotoga o Pisinisi. A silsila lau afioga i le Minisita, o le tele o le vaega lea, le Private Sector lea, e le o i ai le vaega tu maualalo, o le tele o i latou lea e i luga o le vaega lea, o le afaipisinisi lapopoa. E le o i ai la nai faleoloa laiti ia e i tua, o i latou o lo o faia le ice pop, ice cake ma kekepuaa, i afioaga i nuu i tua. O lona uiga la a aumai nei i totonu le Private Sector lea e ala i le Peresetene ma latou ia fai pisinisi lapopoa, ona ou alofa lea i le tamaoaiga o si o tatou atunuu, i e tonu lava o lo o faia mai faleoloa laiti i nuu i tua, le tamaoaiga lea. O i latou tonu na o lo o manaomia le tulaga lea i totonu o si o tatou atunuu. A o lea foi la ua toe aapa le Malo e aumai i totonu le va...e lelei le tulaga lea o le aumai i totonu e faavave ai le faatinoina o galuega. Ae o le popolega lena o lou nei sui usufono, e le gata o lea ua aumai nei i totonu sui ia o pisinisi tetele ia po o.....o mai lava latou ia fai le faaiuga, lolo laia o nai pisinisi ia e i tua. O le agaga la le sui usufono lea e avatu faamolemole, o le le gata o lea ua tuuina mai i totonu se sui o le Peresetene lea o Pisinisi lapopoa ma Alamanuia, o le toatele foi lena o i latou o lo o i ai. Ae sa faapea e tau manatu ifo i le vaega lea mo lalo lava. I le vaega lea o lo o nonofo i nuu ma tausii nuu ma fai o latou faleoloa laiti i tua. Aua o le agaga sa i ai lou sui usufono o lenei itumalo, e manaia pea aua le o mai i totonu, fai lava faaiuga a le Malo. O a faaiuga a le Malo, fai, o latou ia e o mai e pei e **challenge** faaiuga a le Malo. E omai e aumai faitioga e malosi ai tatou...

FOFOGA FETALAI: Na ona ou faamanatu atu, e manaia le saunoaga a le sui usufono e faamaite mea lelei. Malo faafetai. Manatua foi o le faaaliga, e latiti lava si teuteuga o le Tulafono, na o le suiga o le Komiti Faatonu, lea o le a aumai ai le sui mai le Chamber faapena foi.....aua o latou a fonu ona o ifo uma lava lea o i latou i ai i o. A o i la i le Komiti faatonu, o lea ua fa'i mai le sui o le aufaipisinisi i ai i totonu e faaopoopo ai. E faapena e le se mea umi, o si mea laititi lava.

Afioga SULAMANAIA FETAIAI TAUILILI TUIVASA: O le a faauma atu..

Afioga Hon SILI EPA TUIOTI: Lau Afioga i le Fofoga Fetalai, e na ona tali vave atu i le saunoaga matagofie a le sui usufono. O le vaega lea o le Chamber of Commerce, o lea ua latou faaavanoa le tulaga foi ia mafai ona avatu uma lava le aufaipisinisi laiti ia, le vaega la e fai **handicrafts**, i latou ia e faatau oloa i le tatou maketi. O i latou uma na o lea e faaavanoa i totonu o le chamber. E laititi ai foi le latou tupe totogi e le faatusatusa i kamupani tetele ia. O lo o i ai foi la tatou faalapotopotoga lea sa taua o le **Small Business Enterprises Centre** lea ua taua o le **Business Hub**, o i latou foi na o lo o galulue faatasi ma isi....aemaise lava i a tatou pisinisi laiti ia le aufaifaatoaga laiti i nuu i tua. O i lea e agai mai i ai e manaomia ni loans, o ni **guarantees** ma tulaga faapena.Ua i ai foi le tatou faalapotopotoga o le Faletupe o Atinae o Samoa. O le tasi foi lena....o i latou foi lena o lo o fesoasoani tele i le faamatuu atu o nonogatupe e fesoasoani ai i le aufaifaatoaga o le aufailafumanu ma pisinisi laiti lea e i ai nei. O lona uiga o lo o mafai lava ona tatou, iloa o a manaoga ia e maua mai, e le gata.....aemaise lava i le Chamber of Commerce, Faletupe o Atinae, o le tatou Faalapotopotoga lena o le Small Business Enterprises Centre.

E pei foi ona silafia o lea foi o lo o i ai isi Faalapotopotoga o lo o tuu sao atu lava tupe laiti o le Micro-level. O lea e tele sa o tatou talanoa ai foi, o lo o pei e fesoasoani lava i tamaitai. O lea foi sa tatou talanoa ai i le isi taimi, sa i ai le faitioga faapea, ua fai si maualuga tele o tului. A o le tulaga lena, e le mafai ona tatou fai toatasi e le Malo ni faaiuga i totonu o faiga faavae i totonu o Pisinisi. E tatau ona tatou talatalanoa ma le aufaipisinisi, e faailoa mai foi e latou ia i tatou, o a nisi faiga fou e tau fesoasoani ai i le tulaga lea o le atinae o tatou pisinisi, ina ia lava avanoa faigaluega, ina ia mafai ona tatou faia nisi mea. E pei foi ona tatou silafia o le taimi lenei o lea ua telesa tatou aumaia fuamoa ma tulaga faapena mai fafo, o lea ua mafai ona maua uma i totonu o le atunuu. E taua lava ia tatou le talatalanoa ma faalogologo i le Private Sector, po o a ni teuteuga e tatau ona fai e tatou i le tatou **Enabling environment**. E le mafai ona tatou **dictate** atu i le Private Sector. Aua e tatau ona tatou galulue faatasi. O le finagalo lena o le Malo

ina ia faapea ona tatou faipaaga ma le tatou vaega Tumaoti. Ma le faaaloalo lava.

FOFOGA FETALAI: Malo...se i tulai mai le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, o le fono lea na fai talu ai nei i Tuvalu a le taitai o le Pasefika ma isi fonotaga na muamua atu. E i ai lava le vaega o le fono e faapolokalame, e o atu ai sui o le aufaipisinisi po o le private sector a atunuu uma lava o le Pasefika, e avatu o latou manatu i le mea e tatau ona fai e le Malo, mo le faaleleia o le atinae. O le isi la mea lea e taua tele, ona o le tele o Malo o le Pasefika e leai ni mea faapea e faia. E na ona mana lava o le Malo e fai lea mea, fai loa e pei o le mea lea sa tulai mai ai le sui usufono. Ona afaina ai lea o gaoioiga a private sectors po o le aufaipisinisi, po o e o lo o gafa ma atinae a na foi Malo. Ae ina ua latou iloa e i ai le tulaga lea o lo o faia, pe feutagai i ina e maua foi latou i le tulaga lea o lo o i ai Samoa. Ae o le Tulafono lenei, ua 30 tausaga talu ona i ai le komiti lea...na faatuina i le Nofoaiga i le 1988 – 1991, a o lona uiga ua leva lava ona tilotilo i ai le Malo a le HRPP i le tulaga lea o le galulue faatasi lea e saunoa i ai le Minisita o lo o gafa ma mataupu tau tupe. O lea o i tonu e taoto ai le atinae o le atunuu. Ua leva lava ona faia tatou fonotaga, aepeiseai na o le Malo lava, a manatu le Malo e toe teuteu lea Tulafono e toe siitia ai lafoga ma tiute, aua o mea lava ia e aoga i ai le komiti. Ae o le tele o le taimi a alu atu nei la tatou faaiuga, e faitio ai lava le vaega lea o le aufaipisinisi, i le le tapaina foi o latou a o le i faia le faaiuga. O se teuteuga taua tele lea, o lea faatoa fai ina ua 30 tausaga. O le tausaga lea i le Nofoaiga lava lea. O lea foi na sui ai ma le tausaga faaletupe a Samoa, ua le o i le tausaga faalekalena o Ianuari – Tesema, ae o loa tatou i le tausaga faaletupe lea ua alu ai nei tatou i le **Fiscal Year**, amata mai ia Iulai i le faaiuga o Iuni ina ia o gatasi ai tatou ma atunuu ia e maua mai ai tatou fesoasoani ma faigofie ai le **budgeting process**. O le tausaga foi lenei na fai ai ma le faaiuga lea i le amata loa ona...amata mai ai le faiga lea o le faatu aloaia loa o le tulafono lea, ina ia i ai ni sui po o ni Minisita lagolago, ae sa faaigoa muamua o failautusi faapalemene. O latou igoa na muamua, ona toe sui ai lea i le faalupega la lea i ai nei. E tele lava mea lelei na pasia i le taimi lenei, ao le tulafono la lenei, e oo mai nei, o lea faatoa sui. A o le faataua la o le Peresetene e pei ona saunoa le Minisita, ona e le gata ina tupu i i, ae tupu foi i totonu o le Malo. Ia le tuu i ai o le Ofisa Sili, ae oo ifo i le taimi e fai ai le fono ua tie up, po o ua noatia le Ofisa Sili i isi fono ae le sau le Ofisa Sili. O lea foi la e fai ma faafitauili, lea e avatu ai faitioga a le Palemene, e manaomia o Ofisa sili o Pulega o Matagaluega, ae sau le numera 2 po o le numera 3. O le sau o le Ofisa Sili o Pulega po o le Peresetene, o ia lea na te silafiaina mea uma lava, o lo o aafia ai le aufaipisinisi. E le na o le

aufaipisinisi la tetetele ae aofia ai ma faipisinisi laiti, e pei ona saunoa le Minisita o Tupe. A ia tou te manatua, e i ai taimi e tulai mai ai ni mea tetele. Ona manatu loa lea o le Kapeneta o le a aso malolo, e tasi lea mea ua fai ma toatuga i le aufaipisinisi, e tatau ai foi ona oo mai so latou finagalo e auala mai i le Komiti lea, e oo lava i fuafuaga faapea a le Malo. Aua e malolo loa oti atoa a latou pisinisi. I le taimi lea na fai ai le iuga e lua aso e malolo ai. O le matua tele o le afaina o le aufaipisinisi, ona o le tulaga ua ave e le Malo le faamuamua i le togafitiga o tagata, ina ia maua atu o nonofo i fale, ae le o le o atu....o lea ua o atu le malo, ae tau mai o la ua o e fai a latou faatau. O la e malaga atu i o i lea faalavelave ma lea faalavelave po o le faalapotopotoga. O le mea lea na fai ai faapitoa le Tulafono lea...le Poloaiga, e tapuni ai lava ma fale, taofi ai ma faapotopotoga. Ae e afaina uma ai lava le aufaipisinisi. O le ala lea e taua tele ai le tulafono lea, ina ia aumai lava na o le tagata e malamalama, le tagata na ala ona tofia o le Peresetene ona e lautele lana vaai. E sau ai saofai i i, ma aumai ai loa le latou fautuaga e auala mai i le Revenue Board, sau ai i ina i totonu o le Kapeneta. Aua e uma loa le fonu a latou, aumai loa le latou fautuaga i totonu o le Kapeneta, ao se fautuaga ua lava faatalanoa, o lea ua i ai le fautuaga foi a i latou o lo o gafa ma le atinaeina, o i tonu lava, o i latou ia, a lelei ona faafoe a latou pisinisi. Ua tele galuega mo fanau a Samoa. Lau Afioga i le Fofoga Fetalai, o le toe faaopopo atu lea, i le mataupu.

FOFOGA FETALAI: Malo faafetai, tulai mai le sui usufono mo Vaimauga. E tasi o le mea o lea ua uma ona saunoa le sui usufono mo Vaimauga Sasae. O lea foi ua tali le Malo, malo faafetai, malo le faamaite i mea lelei i le tulaga o le faamalamalama. O lea foi ua toe faamalamalama foi e le Palemia le lautele ma le loloto o le teuteuga o le tulafono, malo faafetai.

Na faamaonia le lafo ma faitauina le Tulafono Tau Faaofi o Teuteuga o le Tulafono o le Pulega o Tupe a le Malo 2019 i lona faitauga faalua.

TULAFONO TAU FAAOFI O LE VAEGA O FAATOAGA MA FAIGAFIIVA 2019. Faitauga faalua

FOFOGA FETALAI: Tapa lau Afioga i le Minisita o Faatoaga.

Tofa Hon LOPAOO NATANIELU MUA (Minisita o Faatoaga): Taea manuia i lau Afioga i le Fofoga Fetalai faapea le mamalu o le Fonousu a Samoa i lenei taea. Lau Afioga i le Fofoga Fetalai, ou te faatu le lafo, *Ina ia faitauina nei le Tulafono Tau Faaofi o le Vaega o Faatoaga*

ma Faigafaiva 2019 i lona faitauga faalua. Ma ou te fia tautala faamalamalama i ai.

Faaluaina e le Minisita o Tupe.

FOFOGA FETALAI: Ou te tapa ma le faaloalo lau Afioga i le Minisita mo lau saunoaga faamalamalama.

Tofa Hon LOPAOO NATANIELU MUA: Lau Afioga i le Fofoga Fetalai, o le Tulafono lenei o Faatoaga ma Faigafaiva, ua tuuina mai ina ia suia ai le Tulafono o Faatoaga ma Faigafaiva 1959, o lenei Tulafono na faatuina mai ae le i Tutoatasi lo tatou Malo. I lena foi vaitau, ou te lagona na o le fai, koko, popo ma talo sa auina atu i maketi i fafo ma le tele o faiga faatoaga a le tatou atunuu sa i ai. Ae o lenei vaitaimi ma lenei tausaga fou, ua fai sina tele o le vaega o faatoaga, e le gata i lea o faigafaiva. Ua tele foi a tatou faiga fou ma le vaega o lenei tausaga fou le alualu i luma o le soifuaga, ua i ai foi le gasologa o le soifuaga ua i ai nei i Samoa. Ua tele suiga ma matauina ai i le itu tau i le fefaatauaiga o tamaoiaiga, siitia le tulaga o le soifuaga lautele ma agafesootai, i le itu ma alamanuia o le soifua maloloina ma le vaega o le tekonoosi faaonaponei. Ua aafia ma manaomia ai, le i toe silasila o le tatou Malo i suiga ma le faatuina o le Tulafono fou lenei e pei ona faataatia mai i le Laulau-a-Fono a le Palemene.

O le tulaga e pei ona i ai le tatou Fonotaga i le pre sitting i le taimi na tuuina mai ai le Tulafono lenei. Ou te manatu sa faamalamalama auiliili e le Matagaluega e ala i le Ofisa Sili o Pulega le faamoemoe o lenei Tulafono. Sa ou fiafia lava i lena aso, i le toatele o i latou o sui usufono o le Maota sa faaali o latou finagalo. O lona uiga la, o lenei aso ma le tuuina mai o le Tulafono ma lona faitauina faalua, atonu e le toatele nisi, ma atonu foi e leai nisi manatu e toe faia, aua ua malamalama le mamalu o le Fono nei i le faamalamalamaina. Ae na o nai isi vaega ou te fia tautala i ai.

O le vaega muamua: O le faatomuaga, ou te fia faapea atu, ou te fia faatepa a outou afioga i le Vaega muamua o le Tulafono Tau Faaofi, o lea ua faailoa atu ai, taiala faavae autu. O lenei faaopoopo i le Tulafono e fou, ae ua manaomia ai e le Matagaluega ina ia faagata i ala faavae autu nei, pe a faia o ni faaiuga tau atinae mo le faafoega ma le tau puipuiga i totonu o le Matagaluega.

Vaega lona lua: Galuega tauave o malosiaga o le Minisita ma le Ofisa Sili o Pulega. O vaega lona lua o le Tulafono Tau Faaofi, ua aiaia ai mo galuega tauave malosiaga o le Minisita ma le Ofisa Sili o Pulega, o galuega tauave o le Minisita e aofia ai le tuuina atu o faiga faavae, ma taitaiga lelei o le Matagaluega. O fuafuaga faataatia alualu mamao e ese mai i ia itu ia galuega a le Ofisa Sili o Pulega, ma le faamautinoaina o le tulaga lelei atoatoa, ma le mafai gafatia e le Matagaluega. Ona faatino galuega i aso

taitasi, e ala i le faatinoaga ma le puleaina o le Matagaluega, o galuega lagolagosua i le Minisita. O le mea lea, e faailoa manino mai ai lenei Tulafono Tau Faaofi, galuega tauave tau Pulega faatonu o le Minisita, ma tulaga manaomia tau faatinoga ma le itu tau pulega a le Ofisa sili o Pulega, e faamautinoa ai le tulaga manino o le tuumavaevaeina lelei o galuega tauave a le malosiaga.

O le tasi lea o vaega sa faapea ona fesiligia ai le Matagaluega ona o malosiaga o lo o tuuina atu i le Ofisa Sili o Pulega, o la e manino lava le Tulafono e pei ona faataatia mai. E pei o le mea foi lenei, e uu le moa ae togi lona afa. E ave lava le malosiaga i le Ofisa Sili ma le Minisita, i lalo o le faatagaga a le Kapeneta. Ae i ai foi le taimi e faapea ona faaletonu ai, e pei ona taua i lalo o le palakalafa 6 o le Tulafono. E mafai foi ona toe faafoi mai pe suia foi, o le tulaga lena lau Afioga ma le mamalu o le tatou Fonotaga. E fia faamalamalama laititi atu le tulaga lea, ona sa tele fesili i lena aso, sa tuuina mai i le malosiaga e tuuina atu i le Ofisa Sili o le Matagaluega.

O le vaega lona tolu: Pulega ma galuega tauave a le Matagaluega. Lau Afioga i le Fofoga Fetalai, o le Tulafono Tau Faaofi e pei ona matauina mai le faatomuaga o le Tulafono Tau Faaofi e faapea, o lenei tulafono Tau faaofi o taiala ua faagaoioia ai le Pulega ma le atinaeina o se vaega tau faatoaga faigafaiva, i se faiga e gafataulimaina ai. Vaega lona tolu, ua aiaia mo le faamoemoe mo galuega tauave a le Matagaluega, o lenei Tulafono Tau Faaofi ua atagia ai le taimi nei, le taatia manino mai o le taiala faataatitia faalettulafono o tulaga, ae ao ona faatinoina ai galuega tauave a le Matagaluega, o aso nei ua tuuina atu ai le mafai gafatia ma le atinaeina o le vaega i tausaga o lumanai.

O le Vaega lona fa: o le Tulafono o Komiti ua maea ona ou faamalamalamaina atu o eseese o le malosiaga o le Minisita i le faavaeina ma le tapenaina o Komiti ma ona sui auai. Pe a faatusatusa i le galuega tauave e tataua ona faatinoina ma le faafoega a le Ofisa Sili o Pulega. O le vaega lea e faapea ona aumai ai le malosiaga i le Minisita e ave i le Ofisa Sili o le Matagaluega e faatuina ai le komiti i lalo o le maliega a le Kapeneta, e fai ai se komiti po o le a lava se vaega e ono tuuina mai aemaise o lenei vaitaimi i le tele ma le lavelave o faiga o lo o faagaoioia ai totonu o le Matagaluega o Faatoaga, i le taumafaiga o atinae o faatoaga ma faigafaiva, e manaomia ia le komiti e pei foi ona tatou talanoa ma faatuina ai foi le lafo e pei ona tuuina atu nei a le Afioga i le Minisita o Tupe. E manaomaia lava le komiti e faigofie ai le fesootaiga, i le va o le Matagaluega ma le Malo ma le aufaifatoaga ma le aufaifaiva. O lalo la o le vaega lea, o lo o i ai lena malosiaga.

O le Vaega lona lima: O mataupu eseese, o le vaega mulimuli o le Tulafono Tau Faaofi ua faataoto atu ai mataupu masani faalettulafono, o lo o aiaia ai mo mataupu e manaomia faamaoniga pui puiga ma tulaga faaaitalafu tau le tagata lava ia mo tagata faigaluega a le Malo. O i latou ia

o lo o galulue i le agaga mama i le faatinoina o latou tiute, ae i ai ma tulafono faatonutonu e soloia, ma mataupu soloaiga ma mataupu faasaoina. O Vaega uma na o le Tulafono e lima ua faapea ona faataatitia atu, ae faapea atu ai sa matou faaupuga faaiu. E leai lava se mea e atoatoa i lona amataga, ae ua tapenaina e le Matagaluega lenei Tulafono Tau Faaofi, ina ia mafai ai ona tulata ma taitaia faaletulafono ona vaega o faatoaga ma faigafaiva, ia talafeagai ma le vaitaimi lenei. O lenei Tulafono Tau Faaofi, o lo o atagia ai galuega tauave, le malosiaga o le Minisita ma le Ofisa Sili o Pulega o i ai i le taimi nei o le Matagaluega, ma aiaia ai mo taitaiga faaletulafono talafeagai e faafaigofie ai le pulea lelei, le atinaeina o le vaega o faatoaga ma faigafaiva ma gafataulimaina ai. O le faaaliga lea ma le faaalalo ma le faamalamalamaga atonu e auiliili atu i se taimi ae i ai nisi vaega e lagalaga i totonu o le faatalanoanoaga, e fiafia lava e tali atu, ma le faaalalo lau afioga i le Fofoga Fetalai. O le faamalamalamaga puupuu lea lau afioga i le Fofoga Fetalai e tusa ai ma le Tulafono, ma le faaalalo faafetai.

FOFOGA FETALAI: Malo, ia ua toe faaopoopo foi se isi faamalamalamaga mai le faamalamalamaga mai le taimi na o tatou semina ai.

Ia atonu o lea ua manino ia le folasaga a le Minisita i le Teuteuga o lenei Tulafono.

Na faamaonia le lafo ma faitauina le Tulafono Tau Faaofi o le Vaega o Faatoaga ma Faigafaiva 2019 i lona faitauga faalua.

FOFOGA FETALAI: E tusa ai ma Tulafono Tumau o le a tuuina atu le Tulafono Tau Faaofi i le Komiti o le Vaega tau le Tamaoaiga mo le iloiloina ma toe lipoti mai i le Fono Aoaofaitulafono i se fonotaga o lumanai.

**TULAFONO TAU FAAOFI O TEUTEUGA O LE TULAFONO O LE FAAFOEGA O LAFOGA(POLOKALAME FAA-ELETORONI) 2019
– faitauga faalua.**

FOFOGA FETALAI: Talu ai ua ou taulimaina le tusi Faamaonia o le Tulaga Faanatinati ua maea ona sainia i le Tulafono nei, o lea o le a faagasolo ai le faitauina faalua seia oo ina faitauina faatolu. Tapa lau afioga i le Minisita o Tiute ma Tupe Maua.

Afioga Hon TIALAVEA FEA LENIU TIONISIO HUNT: Lau Afioga i le Fofoga Fetalai, ou te tulai atu e faatu le lafo, *Ina ia faitauina nei le Tulafono Tau Faaofi o Teuteuga o le Tulafono o le Faafoeaga o Lafoga*

(Polokalame Faa-Eletoroni) 2019 i lona faitauga faalua ma ou te fia tautala faamalamalama i ai.

Faaluaina e le Minisita o Tupe, Minisita mo Aoga, Taaloga ma Aganuu ma le Minisita mo le Soifua Maloloina.

FOFOGA FETALAI: Tapa ma le faaaloalo lau Afioga i le Minisita e saunoa.

Afioga Hon TIALAVEA FEA LENIU TIONISIO HUNT: Lau Afioga i le Fofoga Fetalai, o le Tulafono lenei e le telē tele. Ia aiaia ai mo se malosiaga o le Komesina o Tiute o Tupe Maua o le Malo, ina ia faatino ia polokalame Faa-eletoroni e maua ai ma mataitu ai ia faamaumauga e sao atoatoa i uiga faaeeina atu o lafoga.

Lau Afioga i le Fofoga Fetalai, o lenei Teuteuga mo le Tulafono Faafoeina o Lafoga ua tapenaina aua le faafoeina ma le tapenaina e le Matagaluega o Tiute ma Tupe Maua. O le Polokalame Faa-eletoroni, e mataitu ia faamaumauga o lafoga i taimi lava e faatino ai ia fefaatauaiga, ma pue loa e le masini faa-tekonolosi, **server** a le Matagaluega i le taimi lava lea. Ma maua ai loa ia lipoti o tupe maua, ma lafoga a le pisinisi, ma o le a mafai loa e le Matagaluega ona faatusatusa ia lipoti nei, ma faamatalaga o lafoga e tuuina mai e tagata faipisinisi, i taimi faa-Tulafonoina i totonu o le tausaga, ma maua tonu loa le lafoga sao e tataua ona totogiina mai e le Matagaluega o Tiute ma Tupe Maua.

Lau Afioga ma sui usufono mamalu o le Palemene, e taua nei ia lenei Teuteuga i le Tulafono autu, faafoe o le lafoga 2012, ina ia mafai ai ona faatinoina ia le polokalame, electronic aemaise le pasia ma le taliaina o Tulafono Faatonutonu Regulations ua maea ona tapenaina, i lalo o le faamalumaluga a le Ofisa o Loia Sili mo lenei suiga, o faamoemoe le Matagaluega e unaia, faaaogaina, nei i le tausaga nei, a le o Aperila o Me o le tausaga lenei lau Afioga.

Ia e pau lena o le faamalamalama, o le auga autu lava o le Tulafono, o le taumafaiga e ao mai uma tupe aua ia polokalame fai a lo tatou Malo, i manaoga i totonu o le Palemene nei, ina ia mafai ona maua atoatoa ma sao ia faamaumauga, ona o lea o le a tuusao mai ia sales. O le taimi lava e fai ai le sale, maua e lo matou Matagaluega ia le invoice ma le tau atoa o le faatau lea.

Ia e i ai lava le talitonuga e i ai foi ni faafitauli i o i faipisinisi i le faaaogaina o lenei foi metotia fou, ia ae talitonu o regulations o le a fai ai ni faasalaga tetele aua le faaaogaina ina ia aua ne i toe faaaogaina se isi till ae faaoga mai na o masini ia o le a tufatufa atu. Ma e 5 vaega e faasolosolo agai i ai le faaaogaina o nei... ona e le mafai ona... i taimi e tasi ia pisinisi uma o le atunuu. E faasolosolo ma e 5 vaega ua vaevae i ai e le Matagaluega. E amata i le isi vaega a uma avatu i le isi vaega, seia oo lava

i pisinisi la e i tua, ia pe a faapea e oo atu i ai ia le internet ona mafai lea ona pue uma mai e le Matagaluega ia latou faatau.

Ia o le faamalamalama lea lau Afioga i le Fofoga Fetalai, ma le mamalu o le Palemene.

FOFOGA FETALAI: Ia malo, faafetai. Ia ua manino auofala i le finagalo o le Minisita e pei ona faapupula ma faamalamalama ia lenei Teuteuga. Ia o le isi faaupuga faigofie o le faafaigofie lava, faafaigofie ai ma maua ai mea mautinoa ina ia atinae ai le atunuu. Ia o le a tuuina atu le fesili.

Susuga Hon LAAULI LEUATEA POLATAIVAO: Lau Afioga i le Fofoga Fetalai, se avanoa o le faitauga faalua pe a talafeagai.

FOFOGA FETALAI: Ia se i tulai mai ia le sui usufono o Gagaifomauga Nu.3.

Susuga Hon LAAULI LEUATEA POLATAIVAO: Faafetai i lau Afioga mo le avanoa. Faamauina foi le lagolago o lenei sui usufono, i lenei Tulafono taua ua tuu mai i le Maota ona o le taumafai lea ia maua uma ia tiute, ina ia talafeagai ia le tuuina mai o faamaumauga, i totonu o le Ofisa o Tiute ina ia fai uma i ai ia calculations e ala i le talafeagai o feaatauaiga.

Lau Afioga ma le agaga faaaloalo ua sui ia le mea lea ua i ai ia si o tatou atunuu, ona ua agai mai pisinisi tetele, latou te fausia ma faatuina nisi o le tele o pisinisi aemaise lava ia mea nei e tau o faleoloa. Tatou matauina e le toe na ma se laina le tele ma le anoanoai o le oo mai i totonu o le taua foi o le auaunaga mo le tatou atunuu.

Ae e i ai lona itu taua ou te lagolagoina ai le tulaga lea e pei o le mea sa tatou i ai muamua, ona o nisi mea sa tatou le mauaina, o lea ua maua. O nisi foi o mea sa tatou le gafataulimaina, o lea ua tatou gafataulimaina ona o le feaatauaiga open lea ua alu.

E pau lava le mea ou te faatauina ai le saunoaga a le Afioga i le Minisita, ia atoa uma mea, ma ia faamaoni tiute ma tupe e ao, leaga o lea ua tatou molimauina, o lea ua i ai ia tagata faipisini ia e i inei, e teu tupe i le fale. They have a big safe at home. Ia ona ave lea i ai o tupe ia i totonu.

O le agaga lena lau Afioga e taua tele ai ia le mataupu lea ua aumai, ua aumai e le Minisita i lana Matagaluega, ia ao uma ia tatou tupe mo tiute ma tatou lafoga. E pau lava lea o lau tautau taulemau lau Afioga i le Minisita ia categorise, aua e le tutusa uma le malolosi o le aufaipisinisi.

O nai o tatou tagata, e leai lava se isi e teua se tupe i le fale. Ou te talitonu o la foi e aumai, a aumai foi o nai pisinisi laiti mo personal effect o nai lavalava ma nai mea e auai mai i nai fanau i fafo, e tau faatu ai se garage sale e tau faatau ai nai mea aua le fesoasoani. Ae o pisinisi a nei o major wholesalers, ma pisinisi supermarket, ou te taofi e tatau lava ona silasila

lelei ia le Matagaluega ia fair ma ia faamaoni mea e aumai i totonu, ia ma mea e declare, ia aua o le commercialisation lea. E ese mai i nai mea ia a nai tagata ia o personal effect, o nai mea tuai ma nai mea e aumai e fesoasoani mo latou.

Ae e pei o le agaga lena lau afioga e fai fuafua foi. O lea ua ou vaai atu i le malosi o le system, ua agai lava i le till e na o na ta lava otomeki i tai i le Ofisa o le Tiute. Ia, ne i lavea le maaaveave le fua lau afioga i le Fofoga Fetalai. Ae o le agaga, o tagata tonu foi nei, o latou nei o lea e faatupuina ia le tamaoiga o le atunuu, ina ne i te i ua o tatou naunau tele, **but we are gonna kill the goose that lays the golden egg.** O latou nei e faataviliina le tamaoiga o le atunuu, ae lafo atu i lau afioga.

Faafetai o lea foi ua maua o le a faatu ia scooters, manaia. A i ai foi se isi system e sili atu, lelei o lea foi ua taatia ia le x-ray lea. Na ou alu foi i le isi au malaga i fafo atu o Asia ma ou vaai ai e na ona tu lava o le container i le x-ray iloa uma lava mea la e i totonu e leai se isi e toe pepelo. E maua uma lava oloa la e i totonu, ia o faatasi ma le clarification o le invoice lea e aumai. O le agaga lena ua ou tulai atu ai ma le faaaloalo ou te lagolagoina ia le Tulafono lea, ina ia lava ia tatou tupe e ao mai i totonu o le tatou Matagaluega o Tupe, ia ma fai faapena ina ia gafataulimaina manaoga o lo o tatou manatu i ai ia le Palemene ma Samoa, ma lou agaga faaaloalo.

FOFOGA FETALAI: Malo, faafetai. Ia se i tulai mai ia le Minisita.

Afioga Hon TIALAVEA FEA LENIU TIONISIO HUNT: Faafetai i lau afioga i le Fofoga Fetalai, faafetai foi i le sui usufono mo le lagolagoina o le Tulafono.

O tai lava i le Tiute o lo o mautu ia le Tulafono i le Tiute o la e pue uma lava ia oloa ma e i ai ia le scooter i tai. O le Tulafono lea e pei e malosi i faleoloa faipisinisi ia e fai ia latou faatau i isi aso taitasi. O retail ma wholesale. O lea foi e tou te faafofoga mai o lea na fai atu e 5 ia vaega ia e faasolosolo i ai ia le faatutuina o masini nei, ua uma ona faavasega ia le vaega muamua.

O le vaavaaiga a le Matagaluega e monitor ai ia oloa ia e fai, e iloa lava e le Ofisa ia faatau la e fai i le aso. A vaai atu ia le Matagaluega ua laitiiti ia invoices la e sau i totonu ae matau i le tele o faatau la e fai, ua o loa saili. O le vaaiga lena e monitor ai e le Matagaluega ia pisinisi taitasi, aua e mafai lava ona tu i i le masini lea ae ua ave le isi till fai i tua. Ma e o faamoemoega foi o faasalaga, ia lava le tetele o faasalaga e mafai ai ona faafoia ia le faaaogaina o masini ia. Ae o le monitor lena a le Matagaluega e vaai ai i le sale o lenei aso, ma le isi aso ma le isi aso.

E tasi le kamupani na amata mai ia Novema ona faapipii. O la la ua sau lava ia le sale a le kamupani lea, na faataitai ai ia le system pe work. O la la e matua work lelei i le kamupani lea na faaoga ai, o la ua iloa lava le sale i aso uma aso uma lava e sau ai le sale, ma e o la e matau lava le alualu i

luma, pau i lalo ae faatoa faamamalu le Tulafono lenei, pe a pasia atu e le Palemene, ona o le a fai loa ma workshops mo isi faleoloa, ma faaputupu atu ai, amata atu ia Aperila, a vave o Aperila ae a tuai o Me.

Lau Afioga e pei o le... o vaega tetele lea e tau saili, o le toatele foi o vaega ia e totogi lafoga, e i ai lava le isi auvaega la e nana i le sefe, e sao lelei.

FOFOGA FETALAI: Ia, malo. Ia se i tulai mai ia le Taitai o le Malo.

Susuga Hon TUILAEPA AUELUA FATIALOFA LUPESOLIAI LOLOFIETEE NEIOTI AIONO GALUMALEMANA Dr. SAILELE MALIELEGAOI: Lau Afioga e tasi lava si mea lea, e taua tele ai le Tulafono. Afai ou te alu atu e fai ai sau faatau e \$100, ae o lea la ua pipii i ai ma le lafoga e \$10 o le vagst, o lea la ua totogi i i le kamupani, o lou la talitonuga, e alu ia le \$10 lea i le Matagaluega, o le mea lenei e taua ai. Ae a piopio loa ia le kamupani, taga ia le \$10 ae le alu i tai i le Matagaluega, o le tulaga lenei e taua tele ai ia le Tulafono lea.

O so o se faleoloa la e te faatau ai ae e vaai atu ua pipii i ai ma le lafoga, lafoga a le Malo e \$10, e tatau lava ona alu ia le \$10 i tai. O le Tulafono foi lea pe a manatua le taimi na faaulufale ai, o le tele ia o savali tetee. O le faaupuga na sese uma ai, o savali tetee o se Tulafono o le a mafatia uma ai tagata. Ae ua uma ona faasilasila atu e le Malo, o le Tulafono lea, e lilifa i tagata e tele ia latou tupe, ia aua afai e \$10 ia lau faatau, e nao le 10% o lona uiga e na o le \$1 e aveese. Ae afai e \$2,000 lau faatauga, ia o lona uiga la e pipii ai ma le \$200 o le VAGST po o le lafoga lea, e alu i le Malo. Afai la o lea e avatu ma alu uma i totonu o le taga a le faioloa lea e le amiotonu, o lea la e totogi atu ia tatou tupe e alu i le Malo ae o lea e faataugalemu e le faioloa. O le ala lenei e taua tele ai ia le Tulafono lenei, lea sa tele ina savavali ai tagata e tetee, ina ia sau i i e faatino ai ia galuega a le Malo.

O le taua ia o le mataupu lea ma le taumafaiga lea ua fai, ina ia aoao uma mai ai ia seleni ia. Ae afai la e leai se mea e faamaumau ai, e le mafai ona iloa. Ae e na o le pau lea o le auala e iloa manino ai, o lea e totogi le lafoga e pei ona moomia i lalo o le Tulafono.

FOFOGA FETALAI: Malo, ia...

Tofa OLO FITI AFOA VAAI: Lau Afioga i le Fofoga Fetalai, e puupuu ia le vaivaiga o si nei itumalo.

FOFOGA FETALAI: Ia, ona o lea ua tali le Malo, i le mataupu lenei, e fai atu ona o lea ua tali le Malo i fesili sa laga e sui usufono mamalu, ae ua faatautuauega ia le toai taunuu mai.

Tofa OLO FITI AFOA VAAI: E puupuu lava e le atoa se 3 minute.

FOFOGA FETALAI: Ia, leaga le mea e faigata o le avafatafata, ia tulai mai ia le sui usufono o Salega.

Tofa OLO FITI AFOA VAAI: Leai, lau Afioga i le Fofoga Fetalai ma le mamalu o le Maota, e 100% le lagolago o lenei itumalo i le Tulafono. Manaia lava le Tulafono i le tulai mai leaga ua leva ona tatou fetaiia ma le mea lea, e le o sao sao ia pisinisi ia ma le faiga o latou tupe e totogi atu i totonu o le tatou Matagaluega. Na pau lava la le fesili lau Afioga i le Fofoga Fetalai, i masini ia o le a faaoga nei, po ua mautu ia se kamupani e ona masini ia mo le faiga o le maintenance?

Ou te manatua ia tatou masini foi ia na sa fai ai ia tatou cash power lea na avatu i Savaii ma... e moi lava na lelei, ia ae e fai lava ma leaga ma iu lava ina toe lelei ai lenei vaega. Ae e pei o lau lenei tuualalo, se i vaai lelei se kamupani o oka mai ai mea na, po o tau sao foi na e i ai, ia ona fai ai lea, ia lelei le maintenance, ia aua e tele masini e tele ia faleoloa.

E pei o si au lenei faaopoopo atu e fesoasoani atu ai ma le Tulafono, ae momoli le faafetai i le Tulafono, faatoa pau lava lea o se Tulafono manaia ua e aumai, faafetai. Faafetai mo le avanoa.

FOFOGA FETALAI: Ia tulai mai le Minisita.

Afioga Hon TIALAVEA FEA LENIU TIONISIO HUNT: Lau Afioga i le Fofoga Fetalai, faafetai i le sui usufono pau lea o se Tulafono fai mai o se Tulafono manaia.

Ae o le Tulafono a le Matagaluega o Lafoga, ailoga e i ai se pisinisi e fiafia i ai? Ia ae faafetai o lea ua fiafia i ai ia le sui usufono lea, ae o le lafoga lau Afioga i le Fofoga Fetalai e eseese mamao lava ma mita ia e tau mai. O lafoga ia o lo o faaoga e Fiti i le taimi lenei. Ma o le kamupani i o i Serbia le technology lea e faaoga nei. Ma ua i ai foi ia le latou Ofisa i Fiti e faamoemoe e latou te gafataulima, a i ai ni faaletonu o latou ia e omai e toe faaleleia.

Ma e o le sale lava e sau a le ... a faapea e uma ifo le aso e \$100,00 le sale a le kamupani aua e sau atoa lava ia le lisiti atoa, ia ona matou iloa lea e \$15,000 ia le tupe a matou e tataua ona aumai i le GST pe a \$100,000 le sale. A faapea e \$300,000 i le 2 masina, e \$ 45,000 ia le tupe ua matou iloa, o le tupe lenei o le lafoga o le gst a tagata na totogi i ai, ae 2 la masina ma aumai pea ia le faatumuga o le latou vagst. A aumai lava e tele atu ia le latou expenses, i lo o le tupe lea e faamoemoe e aumai, ia o le mea lava e tasi.

E na o le pau le mea, a uma le tausaga, ua matou mauaina uma lava le sale. O la foi e iloa uma lava ia sales o kamupani ia e aumai i fafo ona o la e mautu i tai i le Tiute i le taimi nei, ua iloa uma lava le aofai o sales a lea

kamupani ma lea kamupani o le tausaga o latou import e aumai i totonu. O la ua faamaumau i tai e le Matagaluega o le Tiute i le taimi lenei. E uma la le tausaga, ua iloa e le Tiute pe fia le oloa e aumai i totonu e lea kamupani ma lea kamupani, ona faavasega ai foi lea i ina ia se guide e fai i ai ia le latou suesuega, pe a uma ia financial statements a lea kamupani ma lea kamupani i le tausaga.

Ia e pei o le agaga lena o le polokalame lea, o le aoga o le gst ia mautu, faafetai.

FOFOGA FETALAI: Malo, ia faafetai.

Na faamaonia le lafo ma faitauina le Tulafono Tau Faaofi o Teuteuga o le Tulafono o le Faafoega o Lafoga (Polokalame Faa-Eletoroni) 2019 i lona faitauga faalua.

TULAFONO TAU FAAOFI O TEUTEUGA O LE TULAFONO O LE MALOSIAGA O LEOLEO 2019 – faitauga faalua.

FOFOGA FETALAI: Tulai mai lau afioga i le Palemia.

Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI (Palemia): Lau Afioaga i le Fofoga Fetalai, ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o le Malosiaga o Leoleo 2019 i lona faitauga faalua ma ou te fia tautala faamalamalama i ai.*

Na faaluaina e le Sui Palemia ma Minisita o le Kapeneta.

FOFOGA FETALAI: O le avanoa lenei e tuuina atu i le Afioaga i le Palemia mo lana saunoaga faamalamalama.

Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI: Lau Afioaga i le Fofoga Fetalai, ou te tulai atu ma le agaga faaaloalo, e faamalamalama ia le Tulafono lenei. O se Tulafono ina ia mafai ai e le Komesina o Leoleo ona faatino ia ni isi o tiute e aofia ai ia le resitalaina ma le laiseneina o taavale, ia faapea foi ma le laiseneina o avetaavale.

E pei ona silafia o matafaioi ia sa i lalo o le Matagaluega o Felauaiga i luga o Laueleele e ese foi ia latou leoleo, sa latou faatinoina ma tulituliloa le faatinoina o galuega nei. E manatu le Malo e toe foi i o i le Ofisa o Leoleo, e pei ua masani lava tagata i le vaaiga a leoleo, ia ma faatino ai e

leoleo ia le tulaga lea, i fesuiaiga o Tulafono ua i ai nei. Ua maea foi ona fuafua e le Malo ia le nofoaga o le a faatino lelei ai ia le latou gaiouga leni, ia e aofia ai ma le aoga e aoao lelei ai ia avetaavale a o le i faia e le i toe faafouina ia latou laisene po o ua pasia foi ia latou laisene.

Ua tele naunau ia faalavelave e tutupu i le mea lava leni o tagata ua maua laisene, ae lavevea pea ia laisene i tulaga ua le saogalemu ai le toatele o le atunuu o lo o feoai i luga o aualatetele.

Ia lau afioga e faigofie lava ia le Tulafono, ma ua uma foi ona faamalamalama e le Matagaluega o Leoleo i le aso na faia ai le feiloaiga faale-aoaoga e faamalamalama ai nei Tulafono i le Maota nei.

FOFOGA FETALAI: Ia malo faafetai, ia ua manino le folasaga a le Palemia.

Tofa OLO FITI AFOA VAAI: Lau Afioga i le Fofoga Fetalai...

FOFOGA FETALAI: Ia se i tuu atu le avanoa i le sui usufono o Salega Sasae.

Tofa OLO FITI AFOA VAAI: E taua foi le Tulafono e pei ona aumai. Leai e pei o lea e agatonu i le faiga o laisene ia ma mea faapena, ia ia te au lava ia ma tulaga e i ai ia le vaega lea, ona e ta te le i vaai lava i isi atunuu o fai ai ni mea ia e matua faaalu i le atoa e pasi ai le laisene, i le tele o lea laueleele o le a faaoga e le Matagaluega e fai ai mea ia. Fai atu foi ia ae e le faaoga se isi vaega i se isi atinae a le Malo.

O lona 2 lau Afioga i le Fofoga Fetalai, pe le ua alagataua ona faaoga mai ia le tatou Private Sector, ma le tau o mai o tatou tagata mai i tua ma o mai lava e laisene i le mea lea e tasi i Vaitele, ae ua le laisene lelei ia inisinia a tatou ia o inisinia taavale, ia ona fai lava lea i tua ia le laiseneina, ia ma sefe ai foi ia le latou tupe e tau omai ai i i.

E pei o nai vaega na lau afioga, ae taua tele ia le Tulafono ae pau lava lena, ia e leai ia ni tatou taavale tutuu e ono fai ai ia siaki ia mo le saosaoa ma mea faapena.

Susuga Hon TUILAEP AUELUA FATIALOFA LUPESOLIAI LOLOFIETEELE NEIOTI AIONO GALUMALEMANA Dr. SAILELE MALIELEGAOI: Lau Afioga i le Fofoga Fetalai...

FOFOGA FETALAI: Ia se i tulai mai ia le Palemia.

Susuga Hon TUILAEP AUELUA FATIALOFA LUPESOLIAI LOLOFIETEELE NEIOTI AIONO GALUMALEMANA Dr. SAILELE MALIELEGAOI: A oo loa i le tulaga e aafia ai ia le soifua o tagata, o mea ia e tatau ona taofiofi pea e le Malo. Ua tatou iloa lelei lava

mea ia e tutupu faigofie lava ona faasee e le isi ia le isi, ona te i lava lea ua maua fua ia le laisene ae e le i testing. Se o Samoa lenei, e iloa uma lava e le lima taumatau ia mea e fai e le lima tauagavale.

Lau Afioga i le Fofoga Fetalai, o le toe faamalamalamaga lena.

FOFOGA FETALAI: Ia malo.

Na faamaonia le lafo ma faitauina le Tulafono Tau Faaofi o Teuteuga o le Tulafono o le Malosiaga o Leoleo 2019 i lona faitauga faalua.

TULAFONO TAU FAAOFI O TEUTEUGA O LE TULAFONO O FESOOTAIGA 2019 – faitauga faalua.

FOFOGA FETALAI: Tapa ma le faaaloalo lau Afioga i le Minisita o Fesootaiga.

Afioga Hon AFAMASAGA LEPUIAI RICO TUPAI (Minisita o Fesootaiga, Faamatalaga ma Fesootaiga Vavave Faaneionapo): Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Fesootaiga 2019 i lona faitauga faalua ma ou te fia tautala faamalamalama i ai.*

Na faaluaina e le Minisita mo Faamasinoga, Minisita mo Aoga, Taaloga ma Aganuu ma le Minisita o Tupe.

FOFOGA FETALAI: Ia saunoa lau Afioga mo le avanoa.

Afioga Hon AFAMASAGA LEPUIAI RICO TUPAI: Lau Afioga o le Tulafono lenei, ia ua faatuina ina ia faapena ona faia nai suiga laiti i le Tulafono o lo o i ai nei ia le Tulafono o Fesootaiga o le 2005 ia faapea foi ia le Tulafono o Fesootaiga o le 2010, ina ia ogatasi ai ma le vaega o le faavae 32 o lo o i ai nei ia le faagaioiga o Matagaluega a le Malo, o i latou uma o Ofisa Sili, o lo o faapena ona lipoti mai i le Kapeneta ia ma le Minisita o lo o faapena ona vaaia ia le Matagaluega.

Ia matauina foi i lea aso, sa faapena ona tatou talanoaina ai le Tulafono i le tatou ona nofoia ae tatou te le i feagai ma le Palemene, ia e le tele ia ni finagalo na faalia i ia tulaga ma lelei lava ona tali ma maioio le faamalamalamaga a le Ofisa o le Pule Faatonu i le tamaitai Pule ma le Matagaluega, ia o le mea lea, ou te manatu e le tele ia ni tulaga e manaomia tele e faamalamalama i nei Tulafono. Ia ae se i vagana ai o lena e pei ona manino, ia o tiute uma ma matafaioi o lo o i le malosiaga o le Pule Faatonu, ia o le a faapena ona noatia ma oo atu i le Kapeneta, ia ma le

Minisita e nafa ma le Tulafono. Ia, e pei o se faamalamalamaga puupuu lea mo le silafia e le tatou Palemene, faafetai.

FOFOGA FETALAI: Ia malo faafetai.

Afioga SULAMANAIA FETAIAI TAUILILI TUIVASA: Lau Afioga i le Fofoga Fetalai pe maua se avanoa...

FOFOGA FETALAI: Ia se i tuu se avanoa, tulai mai le sui usufono o Vaimauga Sasae..

Afioga SULAMANAIA FETAIAI TAUILILI TUIVASA: Ia e momoli le agaga faafetai o lenei itumalo i le afioga i le Minisita, aemaise foi o le Minisita Lagolago, aemaise foi ia le Faauluuluga o lenei Matagaluega a le Malo ma le aumaia o Tulafono e teuteu ai Tulafono i totonu o si o tatou atunuu.

E mama i lenei sui usufono ia lenei Tulafono ona o lea ua oo i totonu o le Faavae. Ae e lagona lava ia le agaga faafetai ona o le mataala foi o le afioga i le Minisita aemaise foi le fautuaga a le Minisita Lagolago. O le tele o Tulafono lea e faalogologo ai i lenei taeao ua toe aumai i totonu le malosiaga i le Minisita ma le CEO. A o le Tulafono lenei, o lea lava ua aumai ave sao i le Faavae. O le fiafiaga o lenei sui usufono, ona a tatou silasila ma vaai i le tulaga lea i le sau a le fesootaiga televavave lea ua i ai, ua le mafai e tatou ona fuafua. O lea foi e tele lava finagalo na faaali foi i le Tala Faaopoopo o le Tupe i le sau lea o fesootaiga mai fafo i si o tatou atunuu, ua televavave cables foi ua aumai e le Minisita ma le Malo, a o le tulaga lea e i ai, e le o i ai ni faamama e pei lava o le tele...ina taua, e le o i ai ni faamama e faamama ai mea ia ua mafai ona silasila i ai alo ma fanau, aemaise le tatou atunuu.

O lou la agaga faafetai, ona o lenei Tulafono ua aumai e le Afioga i le Minisita ma le Minisita Lagolago, o lea ua aumai ave sao lava i totonu o le Faavae. Faafetai lava i lenei tamalii o lo o tulai mai ai, o le Samoa, ae tafefe pe ana tulai mai o se papalagi, ona a... A tatou silasila i atunuu mamao i le tele o le fasioti tagata, o le safety lea e talanoa ai le sui usufono. E tele ina faatauaina o le tatou puipuia o tatou. O le tele o mea pei o le tulaga lea na i ai le Fonotaga i le vaiaso ua tuanai na ii loa le sailini o i le atoa i fafo, ua lagona le sailini. A o le safety lea e sau i luga o le upega tafailagi ma mea faapena, e le iloa. Na ou faitau i le news i le vaiaso ua tuanai i le tulaga lea na tupu i Niu Sila i le fasiotiga o si tina lea na o atu lava fanau ma nisi, e faapena le sau a le mea lea ua sau i totonu o le tatou atunuu. A tatou le mataala la i le Matagaluega lea po o le Regulator i le puipuia i totonu o le Faavae, ia o le popolega lenei o lou sui usufono.

Ae ou te faafetai lava i lau Afioga i le Minisita leaga o lou faalupega sole o le matematemalo i le matematega o mea e le i tutupu i totonu lava o le

Matagaluega lenei o Fesootaiga. E leaga o le ala lea o lea foi ua tatou vaai i le aumaiga i totonu, ua le gata o matafaioi, o galuega tauave ma le malosiaga. O lona uiga, ua leai ma se mea o toe i ai i le tulaga i le Regulator po o lea foi tamalii o le a i ai, o lea o le a galulue faatasi ma le Minisita. O le popolega la o lou sui usufono, a alu alu ae faaletonu lenei Matagaluega, ua tatau ona faamalolo ma le Minisita. Aua foi o lea ua la galulue faatasi, o mea uma e tapa e le Regulator le Minisita e fia alu i Niu Sila, ioe. Ua pei ua faapena le... ae a i ai la se faaletonu, o lou popolega lenei, leaga o lea o le a alu i totonu o le Faavae. E sasi loa le Regulator, o lona uiga... leaga o lea e sau atoa, o le malosiaga, o le power ma mea uma ua galulue ma control atu e le Minisita ae lagolagoina e lenei itumalo lenei Tulafono lau Afioga i le Fofoga Fetalai.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, pau lava si faasaoga, e le faapea e alu i totonu o le Faavae, a o lo o mulimuli le Tulafono i le Faavae. O le faasaoga lenei ne i te i ua faatali faatali e leai se teuteuga o le Faavae ona fesili lea o se isi, o le a le mea ua le aumaia ai le teuteuga o le Faavae e pasia? E leai, o lea e mulimulitai le Tulafono i aiaiga o le Faavae la e i ai.

FOFOGA FETALAI: O lea la faatoa... aua e pei e sao mai le... Se i toe tulai mai le sui usufono.

Afioga Sulamanaia Fetaiai Tauilili Tuivasa: Lau Afioga i le Fofoga Fetalai, o le mea lava lenei. O le tulaga lea e fai atu aua o le tele o isi teuteuga e le o alu i totonu o le Faavae o lea e alu lava i le malosiaga o le Minisita ma le... A o le tulaga lea o lea ua aumai i totonu o le Tulafono lea e 32 lea e avatu e le Faavae. O le agaga lenei na ou fai atu ai i le maua o le mea. O isi teuteuga e pei ona ou fai atu e toe avatu e le Minisita le power i le CEO. O isi foi teuteuga lea na talosaga mai ai le Minisita o Tupe Maua se i avatu se power ia te ia ua le oo i ai lona malosiaga. A o le tulaga lea, o lea ua aumai ave sao lava i totonu e pei e fuafua mai, lea e talanoa mai ai le tamaloa lea.

FOFOGA FETALAI: Lau Afioga i le Fofoga Fetalai, se i tulai mai le Minisita mo Alamanuia ma Leipa.

Afioga Hon Lautafi Fio Selafi Purcell (Minisita mo Pisinisi, Alamanuia ma Leipa): Lau Afioga i le Fofoga Fetalai, na ona ou fia faafesili atu i le Afioga i le sui usufono mamalu aua o lea sa fai lana saunoaga muamua, e faafetaia lenei Minisita ma lana Minisita Lagolago i le mataala. A o lea la ua toe fai mai le saunoaga a le sui usufono, a i ai se

faaletonu, e tatau ona faamalolo le Minisita. Ae faapefea la le Minisita Lagolago?

Afioga Sulamanaia Fetaiai Tauilili Tuivasa: Lau Afioga i le Fofoga Fetalai, o le tai lena o le afi lea e i ai o le faaosoosoga a le Minisita Lagolago a ua lagolagoina e lenei itumalo le Tulafono a le Afioga i le Matua o Usoalii ma le Minisita Lagolago.

Tofa Lealailepule Rimoni Aiafi (Faleata Sisifo): Lau Afioga i le Fofoga Fetalai, o le ma talanoaga ma Sula fai mai, o le a sau e lauga. A i ai se mea e tulai mai, tuli le Minisita ae alu ifo oe e Minisita, a o lea ua sau le faauma lana tala. Ma lou faaaloalo lava.

Tofa Olo Fiti Afoa Vaai (Salega Sasae): Lau Afioga i le Fofoga Fetalai...

FOFOGA FETALAI: Malo faafetai. E fia saunoa le sui usufono?

Tofa Olo Fiti Afoa Vaai: Ia, e puupuu foi se manatu, vaivaiga o lenei itumalo.

FOFOGAFETALAI: Ia, tulai mai le sui usufono mo Salega Sasae.

Tofa OLO FITI AFOA VAAI: E fia piiama lava i le mea lea na saunoa i ai le sui usufono mo Vaimauga Sasae i le tulaga o le tatou Regulator po o le Pule Faatonu. E 10 ma ona tupu tausaga toetiti lava... pe ua ova foi ma le 20 tausaga o nofonofo ai se alii papalagi i ina, e leai ma se mea a le Malo na fai i ai i le malolosi o le sau o le faaiuga a... A o lea la ua Pule Faatonu loa si tamaitai Samoa lea, pei ua faigofie ona fai i ai tulaga faapena.

Lau Afioga i le Fofoga Fetalai, a silasila nei i le tulaga lea ua i ai, o lea la o le a soosootauau ma le Afioga i le Minisita. O le Minisita lea e i ai service providers, o le MCIT i lalo o lana vaavaaiga. A faapefea nei la ona fai le galuega a le Regulator? Aua a fai atu nei se faaiuga a le Regulator i service providers ia, a o lea e i ai i luga le Afioga i le Minisita. Lona uiga e fautua atu le Minisita, tuu le mea lena e te fai mai ai ae fai le mea lea ou te fai atu ai. Ia, ma le mea lava lea o le... e ese le manaia pe a ou faalogologo nei i le saunoaga a le Palemia, tufatufa power ina ia tutusa lelei le faaogaina o power i lea mea ma lea mea ma lea mea. A o lea pei ua tufa tufa lea lava ua toe avatu lava le Regulator i totonu ua pule ai lava le Kapeneta. E pei o le ala lena o lou tulai atu lau Afioga i le Fofoga Fetalai.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegai: Lau Afioga i le Fofoga Fetalai, e le i ai ea le sui usufono lea i le taimi... O lea sa ou talanoa i le va

o le Palemene ma le Faamasinoga le Tafatolu ma le Pulega Faatonu. Ou te le i talanoa i se Regulator. O le faalavelave lea o le sui usufono e nofo ma feaveai sese mea. Ou te le i talanoa i ni power o se Regulator. Ma o le taimi foi lene o la e tatou te iloa, e leai lava ni... vaai foi faatoa tau amatamata. E le i oo i ni mea tetele, ni mea lavelave ua pisa ai le atunuu. Faatoa uma atu nei lava le pisa i le Digital TV lau Afioga i le Fofoga Fetalai. Faatoa uma atu nei lava le pisa, ae le i pisa i na aso.

O le tulaga lene o lea na ala ai ona tupu ae se mafauauga e tatau ona toe faataoto, toe teuteu le Tulafono aua foi e le i i ai se avanoa e tupu ai ni... o lea faatoa amata i le taimi lene, ua alu atu la ia ae tutupu mai loa lavelave ia, lavelave la ia lea na tupu mai ai le teuteuga lea, lea foi la ua taoto ai i lagatonu le tulaga na feeseeseai ai foi tatou TV ma le Digital TV, TV taitasi ma le Digital TV. Lau Afioga i le Fofoga Fetalai, o le faasaoga lene, leaga o lea e pei ou te vaai atu e te i valevale mai le sui usufono.

FOFOGA FETALAI: Malo faafetai. Ia, se i saunoa mai le Minisita ona avatu lea o le fesili.

Afioga Hon AFAMASAGA LEPUIAI RICO TUPAI: Ia, faafetai i lau Afioga, o lea ua maua ua maea foi finagalo faaalua o sui usufono, ae laiti lava nai mea ia, o lea ua saunoa le Afioga i le Palemia e faamalamalama le tele o tulaga faanefu ma le le malamalama foi o finagalo faaalua o sui usufono sa i ai. Ae pei o le saunoaga lea faapea e le o i ai ni filters, leai ni faamama i totonu o tatou laina ia, lau Afioga e leai, e tele le faamama la e i ai. O faamama muamua o faamama lea e i totonu lava o ofisa ia o fale telefoni. E sau lava le fesootaiga alu muamua i totonu o le Bluesky o le Digicel ma isi vaega, lea la ua fai lava i totonu i ina faamama muamua e faamama ai laina ia aua ne i tele ni mea leaga e sau ai i totonu a o lo o faaopopo pea ma taumafai pea le Malo, o lea o le a faatuina le tatou Samoa search, le tatou emergency response i mea tau cyber security a le Malo o lea e galulue faatasi ai tatou ma Ausetalia ma lea itu ma isi faalapotopotoga mai fafo, o i ina foi o le a faaopopo ai i luga isi tulaga uma ina ia faamalosi ai le faamama o tatou laina nei ma puipuia ai le tatou national cyber security.

Afioga Fuimaono Teo Samuelu Teo (Falealili Sisifo): Lau Afioga i le Fofoga Fetalai...

FOFOGA FETALAI: Malie le sui usufono o lea ua saunoa le Minisita, malie le sui usufono. Se i faamaea mai le saunoaga a lau Afioga i le Minisita.

Afioga Hon AFAMASAGA LEPUIAI RICO TUPAI: O le isi itu lea na saunoa i ai le sui usufono e faapea o lea e i lalo o le Minisita Ofisa nei o

telefoni, ou te faamalamalama atu lea tulaga, o lea e faafofoga le atunuu, e leai, e le aia fua le Malo i matafaioi a pisinisi. O le Digicel lava ia ma le Bluesky ma isi tatou kamupani ia ISP, o pisinisi tumaoti e le aia i ai le Malo. E pei o le toe faamalamalama atu lea o lea tulaga. Na pau lava lea na o le Matagaluega o Fesootaiga ma le Pule Faatonu o Matagaluega na a le Malo e fitoitonu ma le Malo ae le i lalo o se vaavaaiga a le Minisita se fale telefoni.

Tofa Olo Fiti Afoa Vaai: Lau Afioga i le Fofoga fetalai o se mea lava lea e fia malamalama. Leai e vave lava lau fesili. Se i ou fesili atu lava la i le Afioga i le Minisita, po o le mea e leai se share a le tatou Malo i le Bluesky ma le Digicel fua i le leai o se aia?

FOFOGA FETALAI: Malie le sui usufono se i faamaea mai le saunoaga a lau Afioga i le Minisita. Tulai mai e faaauau le saunoaga ae ou te le i tapa le sui usufono e tulai mai. Mo le silafia e Minisita, se i vagana ua tapa e le Fofoga Fetalai suafa o sui usufono e tulai mai. Ae mafua ona maua avanoa o sui usufono mamalu e tulai mai ona ua outou afifio mai i lalo. Leai, saunoa lava oe vagana ua ou tapa le suafa o le sui usufono. O le tatou Tulafono Tumau lena. Saunoa lau Afioga i le Minisita. Faaii mai le saunoaga.

Afioga Hon AFAMASAGA LEPUIAI RICO TUPAI: Faafetai i lau Afioga, ua manino lea tulaga. Ia ona maea ai lea o se faamatalaga a le matou Matagaluega, o lea e malupuipua mea uma o lea ua saunoa le Afioga i le Palemia i le faamalamalamaina o le tulaga i le Tafatolu Fefaatauaigai o le Malo ma le siakiina o le tatou power, e faapena ona faatino galuega a le Malo. O aso foi la, e le tele ni atinae tetele faapenei e lagalagaina ai Tulafono, a o le taimi lenei, ua manaomia foi ua tele suiga, aemaise i le oo mai o le tatou Digital Transformation lea ua i ai lea ua amata i le TV, faasolosolo atu i le tele o isi fesootaiga ua i ai nei lea o le a tolu tatou cables, i le masina o Me, e tolu i ina tatou cables. Ia ua manaomia foi e toe tilotilo ma toe iloilo le Tulafono. O le Tulafono muamua la lea ua i ai nei le iloiloga, ma o lo o faapena ona agai tonu lava i tulaga o lo o i ai i totonu o le Faavae ina ia faatinoina le malosiaga o lo o i ai le Faavae o le tatou atunuu ina ia faapena ona agai mai le Pule Faatonu i totonu ia tutusa ai ma isi CEO uma a le Malo.

Ia o le faamalamalamaga lea o lea mataupu lau Afioga. Faafetai tele mo le avanoa.

FOFOGA FETALAI: Faafetai. Ona o lea ua tatou taunuu i le tatou malologa masalo, ae se i tuuina atu le fesili.

Na faamaonia le lafo ma faitauina le Tulafono Tau Faaofi o Teuteuga o le Tulafono o Fesootaiga 2019 i lona faitauga faalua.

FOFOGA FETALAI: Ou te faasilasila atu ua tatou toai taunuu i le tatou malologa masani. O le a faataatiaese Galuega ma Taulumaga a le Fono mo lana malologa.

Na faataatiaese Taulumaga a le Fono Aoa mo lana malologa masani i le itula e 10:48 ma toe amatalia i le itula e 11:34 i le taeao.

FOFOGA FETALAI: Ou te faasilasila atu ua toe amatalia Taulumaga ma Galuega a le Fono Aoa Faitulafono. E i ai le manatu ua maua se faaopoopoga ma se faasiliga malosi e faaauau ai le tatou Galuega.

TULAFONO TAU FAAOFI O TEUTEUGA ESEESE (KOMITI FAATINO O FAALAPOTOPOTOGA A LE MALO) 2019 – faitauga faalua

FOFOGA FETALAI: Ou te tapa ma le faaaloalo lau Afioga i le Minisita mo Faalapotopotoga Tumaoti a le Malo.

Afioga Hon LAUTAFI FIO SELAFI PURCELL: Faafetai i lau Afioga i le Fofoga Fetalai. A o le i faatuina le lafo e muamua foi ona momoli atu le faafetai i le tatou Ofisa o le Fono ma lau Afioga mo le taligasua o lea ua tali le sua a le Palemene nei, ua maua foi se faasiliga malosi aua le tauaveina o le tatou Fono.

Ae ua ou tulai atu lau Afioga i le Fofoga Fetalai e faatu le lafo, *Ina ia faitauina nei le Tulafono Tau Faaofi o Teuteuga Eseese (Komiti Faatino o Faalapotopotoga a le Malo) 2019 i lona faitauga faalua ma ou te fia tautala faamalamalama i ai.*

Faaluaina e le Minisita mo Tina ma Tamaitai, Atinae o Nuu ma Afioga ma Agafesootai ma le Minisita mo Faatoaga ma Faigafaiva.

FOFOGA FETALAI: Ma ou te tapa ma le faaaloalo lau Afioga i le Minisita mo lau saunoaga.

Afioga Hon LAUTAFI FIO SELAFI PURCELL: Lau Afioga i le Fofoga Fetalai, o le teuteuga o lenei Tulafono ua tau faaofi nei e tele lava ni vaega o lo o fia teuteuina. Ma o le teuteuga muamua, ina ia suia le fuainumera o Komiti Faatonu mai le mea o lo o i ai nei e tai fitu ma ona

tupu, e le i lalo ifo o le tolu, ae le i luga atu o le lima le aofai o Komiti Faatino i totonu o Matagaluega Tumaoti a le Malo.

O lona lua, ina ia faatulafonoina le avea lea o le Pule Sili o le Faalapotopotoga lava lea e avea ma ex-official o le Komiti Faatonu a le Matagaluega lava lea e pulea lava e ia. O le ex-official la o lona uiga e leai sona power foi lea e fai ai se palota.

O lona tolu, ina ia i ai i le Kapeneta le malosiaga latou te filifilia ai se Ofisa Sili o le Matagaluega po o se Faalapotopotoga e avea ma se Faatonu po o se Director po o se ex-official i le Komiti Faatonu po o se Faalapotopotoga.

Ia, o le aotelega lena o lenei teuteuga o le Tulafono Tau Faaofi lau Afioga. O teuteuga nei lau Afioga ua ala ona faatulai mai ona ua atoa le sefulu tausaga o i ai le Tulafono Tau Faaofi lenei o Faalapotopotoga a le Malo, ma ua oo foi i le taimi e tatau ai ona review pe liuliu po o ogatasi pea, pe ua tatau ona i ai ni suiga. Ma sa fai la lenei iloiloga e le Matagaluega, atoa ai ma le Komiti foi lea tutoatasi o lo o latou iloiloa i latou o lo o fia avea ma members o le Komiti Faatonu a Matagaluega Tumaoti o le tatou Malo. Ma ina ua uma la nei saililiga ma maua ai, e tatau ona toe iloilo le numera o i latou o i totonu o Faalapotopotoga nei, e i ai le mea ua aliali mai, ua toatele, ua duplicate skills la e i ai i totonu o le Board, ma o le evaluation lenei, sa aafia uma ai lava Boards, aafia ai uma ma Taitaifono, ma Matagaluega foi. Ma o le faaiuga lena, ua lavelave tele ma ua toatele tele, ae tatou te tilotilo foi i nisi nuu o le lalolagi ua leva ona i ai nei mea o Matagaluega Tumaoti a le Malo i best practice a le lalolagi o lo o i ai, e pei o le numera lea mai le tolu e oo i le lima le numera o lo o latou faaaogaina, ma e faigofie foi ona faafoe a latou fonotaga ma maua faaiuga i se taimi vave. Ia o lo o gasolosolo ina ia fai se faiga ina ia taumafai e consistent tatou tofiga o tatou tagata nei. O le mea lena ua aumai ai le Tulafono Tau Faaofi lenei, ia tatou taumafai ina ia alualu i luma, e le faapea o le a alualu ai lava i le mea o i ai nei. Ia silafia foi le tatou atunuu e laitiiti le tatou atunuu. O manaoga foi i totonu o se Faalapotopotoga, ia e tasi le tagata ae pe tolu, fa, tomai faapitoa la e ia te ia. Ae le pei o la atunuu e toatele, ma e tele le latou pool foi e select mai ai tagata, a o tatou, ia o nai tagata lava nei. Ia, o le tulaga lena lau Afioga ua ala ai ona maua se manatu tatou te toetoe teuteu le Tulafono ina ia tuu mai i le lima, aua ne i sili atu i le lima ae aua ne i lalo ae o le tolu. Mo le silafia e lau Afioga, tusa e 19 Faalapotopotoga Tumaoti nei a le tatou Malo e i ai latou Tulafono, ma o le 19 la lea o le a teuteuina i lalo i i ina ia tuu mai uma numera o latou Faatonu e pei ona i ai le Tulafono Tau Faaofi. O isi Matagaluega e le tau teuteuina a latou Tulafono o lea lava e ogatasi ma le mea lea tauamafai atu i i. O Matagaluega ia e lua o Taaloga ma le NUS.

O isi tatou Faalapotopotoga ia o trading bodies, e le suia latou Tulafono seia vagana ua sui latou tulafono ia, e taua o articles of association ona o latou lea e faatu o kamupani i lalo o le Companies Act. O le avea ai o se

Pule Sili ma se ex-official, o le tulaga o lo o i ai nei, e pei e tuu lava le Pule Sili ae le faamalosi onua auai i totonu o fonotaga. E le faitio foi ona e tele foi o latou tuatuaiga i le taumafaiga o le Matagaluega, ae faataua ona i ai i totonu o fonotaga nei faatasi i le masina. A le i ai, o le Tulafono e i ai, ia auina mai le tagata lea e avea ma sui pe a le auai i le atunuu, pe a le auai le ACEO, o ia lea e Acting, o ia lena e tatau ona sau i le fonotaga. A o le mea lea e i ai, a le sau le CEO, le sau le ACEO, ua tuu ifo i lalo i officials foi ia, e omai la latou te le mafai ona faia se tonu aua a fai atu i ai po o le a le manatu ae fai mai, se i ou fesili i le CEO pe a foi mai. O tulaga la faapena, e le lelei i le taumafaiga o fonotaga a tatou Komiti Faatonu. O lea la ua faatulafonoina, ia i ai le Pule Sili o Faalapotopotoga uma taitasi e avea ma ex-official o le latou lava Komiti Faatonu.

Ma le lona tolu lau Afioga, e i le Kapeneta le filifiliga e mafai ai ona tofia se CEO o se Matagaluega e avea ma Taitaifono po o se ex-official o isi Matagaluega. O le tulaga lea, e faaeteetegata lava tatou Matagaluega foi ia e tele le aafiaga i tulaga tau tupe a le tatou Malo. Ma o i la e manatu, e tatau lava ona Taitaifono le CEO o le Matagaluega o Tupe ona e tele le aafiaga o alagatupe a le tatou atunuu, e pei la o le NPF, o le Development Bank, o le Central Bank, tulaga faapena.

O le aotelega lena lau Afioga o teuteuga nei e tolu, ma sa talatalanoa foi i le faatalatalanoga muamua po o le Pre Sitting, lea foi sa faasilasila atu e le Matagaluega o Faalapotopotoga a le Malo le auala foi, ma sa malamalama lava sui usufono mamalu. Ma le faaaloalo lau Afioga.

FOFOGA FETALAI: Ia se i tulai mai le sui usufono mo Anoamaa Sisifo.

Tofa Hon LAUOFO FONOTOE NUAFESILI PIERRE LAUOFO (Anoamaa Sisifo): Lau Afioga i le Fofoga Fetalai, na o nai manatu pupuu ia e fia faaleoina o lenei itumalo. Faafetai atu i le Afioga i le Minisita i le saunoaga faamalamalama ua manino ai nisi o vaega, ae pau lava ia o nai itu e fia oo i ai se tautalaga, tailo i ai ne i te i ua esese tatou kopi. O lau kopi lea o le Semina lea na aveifo i le Semina leaga e le i toe aumaia nisi kopi i le Maota. O lea o le a ou tautala i lau kopi lea na aveifo i le Semina lea sa fai. O lea ou te vaai atu i le itulau foi lea e aumai ai le faamalamalamaina o le Tulafono, o lea e talanoa mai pei o le mea lea na saunoa i ai lau Afioga, o le tofiaina, appointment. A o lea ou te vaai atu i totonu o le tino o le Tulafono, o lea e faamatala mai ai le request pe tapa i le gagana Samoa lea e aumai i i, e auai se Ofisa Sili e avea ma sui auai i se faatalanoaga o se mataupu i totonu o le Komiti Faatino. Ua mafua ona ou pai i lea tulaga, ona o lea ou te vaai atu o lea e faagasolo le Tulafono a lau Afioga e pasia i le aso, ina ne i pasia ae toe silasila atu ua i ai se vaega o pau mai pe le o atoa.

O le isi vaega lau Afioga e fia oo i ai se tautalaga, o lea e aumai i faamatalaga faamanuiaga o faatonu po o sui auai. O le faaupuga lea e aumai a pasia le tulafono lenei, o le Tulafono e faamamaluina ai ni folafolaga o ni faamanuiaga ua tuuina atu po o ua faapena ona tuuina atu i sui auai o le Komiti Faatino. O le mafuaaga la lea ua ala ai ona ou talanoa i lea vaega lau Afioga i le Minisita, ona e fia malamalama atili lou sui usufono po o ai e ana folafolaga, a o a foi faamanuiaga, aua pau faiga faavae lea ou te malamalama au i ai, o faiga faavae i mea o faamanuiaga foi nei i alauni po o sitting allowance, o lea lava e malamalama tulaga na. A o lea pei e matau atu i le Tulafono a lau Afioga, pei e i ai ma nisi faamanuiaga foi ia. O lea la e tuuina i ai i le faatonu po o sui auai i luga o ni folafolaga i le gagana faa-Peretania o le tatou Tulafono, lea e faaoga mai ai le upu, promised benefit. E pei la e foliga mai foi lele i lou sui usufono, e le o se tulaga aloaia, Ona e i ai lou talitonuga, o se tulaga aloaia, o le faaiugafonoina lea e le Komiti Faatino o ni faamanuiaga e tuu atu i sui auai ae le faapea e faia i luga o ni folafolaga. A o na foi faamanuiaga i lou talitonuga, e tatau foi ona fai fuafua i ni taiala po o ni faiga faavae a le malo.

E pei o le vaega lena ua mafua ai ona ou talanoa atu i lea vaega, aua ia manatua foi, o lea la e foliga mai o le a tuu i lalo nisi membership o nisi o le Komiti mai le fitu i le tolu pe a. O lona uiga la o se taimi pe a pasia le Tulafono lenei ona toe fai lea o se fetuunaiga po o se suiga o le aofai o sui auai o le Komiti. Na pau lava le itu lea ou te tau vaavaai atu i ai lau Afioga, ona o le tofia o nisi sui fou e avea ma sui auai o Komiti a le Malo po o ni Taitaifono foi, a o ni sui o lo o fuafua e tauva i le faiga palota o lumanai. Aua manatua foi lau Afioga, o lo o i ai foi le faiga faavae a le tatou Malo, e tatau ona faamavae, e tolu masina a o lumanai ai le faiga palota, ua faamavae mai sou tofiga foi lea o la e avea oe ma sui auai o se Komiti Faatino po o la e foi e te Taitaifono. E pei la o le tulaga lena o lea e talanoa atu ai lou sui usufono i fai fai atu foi tofiga ae oo atu po o le masina o Oketopa i lenei tausaga ae faamavae mai nisi ona toe repeat foi lea o le process. A o latou ia e pei e foliga mai o le a malolo, o lona la e foliga mai i le Tulafono lenei o le a tuuina atu ia i latou nei faamanuiaga ia ua folafolaina i ai ona malolo ai lea o latou mai o latou tofiga.

E pei o vaega ia o lea ou te talanoa atu ai lau Afioga, se i silasila ane i vaega na o ni sui auai tofia fou i lenei tausaga, ae faapea foi le tulaga lea o faamanuiaga, ona e pei lava ona ou talanoa atu, ou te talitonu lava au ia, e le tatau ona faavae i luga o ni folafolaga, ae faavae i luga o ni iugafono a le Komiti Faatino e fai fuafua i luga o faiga faavae a le Malo.

Ia e pei o le manatu lea lau Afioga i le Fofoga Fetalai e tuuina atu i autafa o le Afioga i le Minisita.

FOFOGA FETALAI: Malo faafetai. Se i tulai mai le sui usufono mo Salega Sasae.

Tofa OLO FITI AFOA VAAI: Faafetai tele i lau Afioga i le Fofoga Fetalai. E puupuu foi lava nai vaivaiga foi o lenei itumalo. Faafetai atu i le Afioga i le Minisita ua manino lona finagalo e tusa ai ma le faataatia mai o teuteuga o lenei Tulafono. E pei o le mea foi lea sa tataou talanoa ai i le Tulafono lea muamua lava i le amataga sa avatu ai le tuualalo foi ona o Komiti ia a le tatou Malo, e power tele, e i ai le power i totonu i le latou faia o faaiuga e talafeagai ma mea ia e finagalo i ai le tatou Malo. A ua manaia la lea ua toe tuu mai i lalo se i tau tuu atu ai le isi vaega lea. O le auga ma le faamoemoe o le tofiaina, o lena foi sa i ai faiga faavae a le tatou Malo, e matua apply lelei e maua ai Board Members. A o le toatele o tatou Board ia, ia e le fai atua sau tala, o lena foi e silafia e lau Afioga.

O le isi mea taua lea ua ou matua, po o le mea o exempt nisi o Minisita e Taitaifono i Komiti Faafoe ia a le Malo? Aua o lea ua taatia le tatou faiga faavae po o le tatou Tulafono, e le toe chair ina e se Minisita Komiti Faafoe nei, a o lea ou te vaai lava o lea a e chair isi Minisita. O le mea la lena e fia malamalama lelei lava po o **exempt** nisi o Minisita i Tulafono ia a lo tatou Malo. Ae na ona avatu la matou tuualao, e manaia ae filifili lelei tatou **Boards** i le agavaa ma o latou tomai faapitoa. O le manaia o lena ua toe tuu mai i lalo, aua o le mea na popole ai, pe na o se toalua pe toatolu tagata e fetai lelei agavaa i Boards ia. Ae a oo loaina palota faaiuga ua alu atu ai loa ma le isi au le agavaa, ona sese loa lea o le faaiuga a le board e fai, sese ma fuafuaga a le Malo na tuuina atu i ai.

Faafetai i lau Afioga i le Fofoga Fetalai mo le avanoa.

Afioga Sulamanaia Fetaiai Tauilili Tuivasa:Lau Afioga i le Fofoga Fetalai pe maua se avanoa o lenei itumalo

FOFOGA FETALAI: Tulai mai le sui usufono.

Afioga Sulamanaia Fetaiai Tauilili Tuivasa: E momoli lava le agaga faafetai o lenei itumalo i le afioga i le Minisita e ona le Tulafono, aemaise foi le Ofisa Sili ma le Pulega i le tuuina mai o lenei Tulafono, aua teuteuga foi o nisi o Tulafono ua leva ona tau teuteu. Matau 19 o Faalapotopotoga foi ma i latou o lo o i ai o se numera tele. A o le manatu o lenei itumalo e faafetai i le Minisita ua tuuitiitia, ona o le tele o tupe a si o tatou atunuu, o lo o alu ai i le tulaga i le totogiina o nei foi vaega o lo o auai. Ae pei e lilifa lava le manatu o lenei itumalo i tulaga i pulega, le Ofisa Sili ma lana pulega ma le Minisita, lea e faatino ai tulaga ia. Ou te le talanoa atu ona o le tele foi o tuuaiga ia e i ai i nisi...i tulaga lava i board ia e avatu faatinoina nisi o Matagaluega. E pei ua le gata ina ua fefe ai le CEO po o le o faauluulu ai, ae pei ua ese foi le faatinoina o tupe o lo o faatino ai le tulaga lea i totonu. Aua ua manatu ifo lava latou o le tulaga lea. Ae ou te faafetai lava i le Minisita i lona mataala ma ua toe faaitiitia. A o au ia,

maumau pe ana ua aveese loa, aveese aua nei toe i ai ni board, pau lava le mea na o le CEO ma le faauluuluga i Matagaluega aumai i le Minisita aumai i le Kapeneta pasia. E tele ai tupe a le atunuu, o nisi mamalu o le atunuu e taitolu taifa board e i ai. Se i silasila ane i lea tulaga, ae ou te faafetai i le mataala o lenei Minisita, ia au lava ia, ou te lagolagoina le aveesea. Aua foi o isi board ia e o atu i totonu e le lagolago i le Minisita, e pei la o i lea o le a faaoga ai lona malosiaga lea o le sui o le board e tete ai i faiga faavae o le atunuu. Aepeitai ane, o le taitaiga a le CEO ma lana ia pulega lea e i ai, aumai i luga i le Minisita e alu lelei lo tatou sa. Ae ou te faafetai i le Minisita, o au ou te matua lagolagoina le aveesea atoatoa, aua nei toe i ai ni board. Ona o le a?o tupe foi a le Malo la e totogi ai. E pei la o lo ta ita.... lea foi e faalogologo i isi, a fai ni faamavaega foi a nisi o Matagaluega, ua o CEO fai ni fuafuaga i ni tupe tetele,ina ia mafai ai ona talanoa board nei ina ia mafai ai ona toe o mai. Se i vaai..E pei ua fai e board ia faaiuga, ae o lea e nofo le Minisita ma le Malo. e pei la o le lagona o lenei itumalo, o le faasaoina o tupe a si o tatou atunuu lea e tau faasoasoa, aveese. Faatino lava e Ofisa Sili o Pulega o Matagaluega tuu mai i le Minisita tuu mai i le Kapeneta, uma. Manuia le Fono.

FOFOGA FETALAI: Malo, se i tulai mai lava le Taitaifono o le Komiti o Tupe.

Afioga ALIIMALEMANU ALOFA TUUAU: Lau Afioga i le Fofoga Fetalai, ou te tulai se i fai se manatu. Ona o se tasi lea o mataupu sa ave soo e le Komiti o Tupe e faafautuaga i le Ofisa lea e feagai ma le mataupu lea. Ona o le tulaga lea i le tatau ona tau faaitiitia e pei ona folasia e nisi o sui usufono. A o le mea e pito i taua i le matou matau talu ai nei ina ua toe faasalalau, o le faamalosiaga o agavaa ma requirements la ua i ai, ina ia agavaa ai sui i totonu o komiti faafoe. O la foi e matau o lo o i ai foi ia se agaga, i ituaiga matata ia e aafia ai o tatou su mai nuu i tua, le tofa lea e i ai lea alii ma faipule. O lea e matau atu o lea ua uma ona tapena lelei lea tulaga. E talitonu o le tele o sulu e maua ai figota. O le tulai atu lea e lagolagoina ai le Tulafono ma le agaga faaaloalo.

FOFOGA FETALAI: Malo, tapa lau afioga i le Minisita pe i ai se isi ou finagalo ae le i tuuina atu le fesili.

Afioga Hon LAUTAFI FIO SELAFI PURCELL: Faafetai i le sui mamalu sa tuu mai o latou manatu, o manatu taua e tapue ai ma toe silasila ai foi, pe i ai i mea e tatau ona toe tapena. Aua o lea e matau atu, e leai lava ni mea o tulai mai e tatau ai ona faapea e ese mai le Tulafono ma le agaga lea e taumafai atu. O le manatu sa faaalua mai e Anoamaa, atonu o le faaupuga e puipui ai ia sui ia o le a tofia, po o sui o la e i ai i le taimi lenei, ae uma le latou ave ma boards ae le i uma le tolu tausaga lea e tuu mai i i.

Faataitaiga, e i ai nisi o boards ia, a pasia le Tulafono, ae pe toe tolu fa masina ona uma lea o le latou tolu tausaga lea sa tofia ai muamua. O le uiga la o le faaupuga lea, i te i ua faapea, afai e fai le Tulafono lea, ona le maua lea e latou o faamanuiaga, ia po o a faamanuiaga.... ae le...e pau a faamanuiaga o lo o silafia le sui, na o le latou totogi. O lea alauni o le latou...ia pau na o mea, ae aua nei aafia tulaga ia e entitle i ai ia i latou ona o le tulafono lenei. Ae le faapea e i ai ni mea e ese atu mai mea ia e i lalo o le Tulafono a le Malo e maua e boards. O le mea lea i tatou tagata ia e faapea e fia o i le Palota, o le faigata ia i le Matagaluega ona aafia mai fua na tulafono i totonu o le taumafaiga o le tulafono lea. O le fuafuaga lava ia, o ai lava e tofia i boards i le taimi lenei, a oo atu i le taimi e faailoa ai o latou ua fia o i le palota, ia faamavae mai. O la e i ai isi tagata foi e iloilo e tauaveina o latou tofiga. Ae le mafai ona faapea, se i oo i le taimi lena po o Setema ea, ona faatoa fai lea o se suiga. O boards foi, e tele lava na tofia **through out the year**. E eseese taimi e uma ai a latou tolu tausaga, e fuafua lava i le taimi na appoint ai latou. Atonu o se taimi muamua lea ua aumai ai se toatele o tagata o le a alu atu, ona amata lea o le tolu tausaga o i latou e fou, i lalo o le Tulafono lenei pe a pasia. A o isi, o lea lava e tauave mai o latou tofiga ae uma i se taimi lata mai, ia e uma lava i lalo o le faatagaga a le **warrant** la sa galulue ai i latou. A o isi e toe tofia, e faaauau la i lalo o le tulafono fou lea. A o e a ua le tofia ona ua uma lo latou taimi, ua le toe manaomia o latou agavaa, ma ua uma foi le taimi, ua tele tele le taimi sa o latou galulue ai i boards, o e malolo ma sue nisi boards e o i ai.

O le mataupu sa faaalua mai e le sui usufono mo Salega, o lo o i ai la tatou komiti tofia foi a le Kapeneta, le **Independence Select Committee** lea sa ou talanoa atu sa o latou faia le galuega. O i latou ia e toatolu e galulue ma le Matagaluega o i latou ia e faataunuu mai i ai tusi talosaga. Ma e le mafai ona tofia se tagata ae le i talosaga mai. O le talosaga la lena, e pei lava o la e talosaga i galuega foi ia...e matua avatu tusi faamaonia o tomai ia e ia te oe. E fuafua foi tomai o i latou e tofia i galuega a lena lava board. Le **business of the organisation**, e le faapea e faasalalau, ae i ai lava **particular aspect** o le pisinisi. E sue mai tagata o lea e tau mai a latou tusi e i ai o latou tomai, ona taumafai lea e tuu i totonu i i. E pei ona fai atu, e laititi lava lo tatou atunuu, o le **pool** foi o tagata lea e apply my board e le se **pool** tele. E faigata foi gaoioiga a le Komiti lea talu ai o le taumafai ina ia paleni tomai I totonu o Boards. E le o toe i ai ni Minisita o aafia i boards ia, ua uma ona pasia le Tulafono e remove ese uma ai lava Minisita. Atonu e i ai lava faatalatalanoaga a le Minisita ia ma le chairman a le board, ia o mea e faaleleia atili ai le lumanai i luma o le Matagaluega. Ae leai se Minisita o toe nofo i totonu i le Taitaifono.

Tofa OLO FITI AFOA VAAI: Lau Afioga o se mea e fia faasao. Malie lau Afioga i le Minisita, o lea e i ai le tatou board lea e chair ai ia Tialavea,

le **liquor board**, o la e chair ai ia Tialavea. O lona uiga e le Minisita ia Tialavea lau afioga?

Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI. Lau Afioga i le Fofoga Fetalai o faiga faavae a lo tatou Malo. E lua tatou ituaiga Komiti, o le Komiti e pasia i lalo o le Tulafono **Statutory Boards**, ma Komiti Fauautua. O Komiti la lea **Statutory Board** e aumai i totonu iinei ma pasia atu ai. Ae a alu atu lava le pasiga iinei, ona alu ai lava lea. Ae o le tulaga lautele lena sa agai i ai fuafuaga a lo tatou Malo. O mea nei o Malo, o Malo uma lava e pule faakomiti. E ala ona tele mea o Komiti, e sau i luga le latou fautuaga i le Malo i lea mea e tatau ai, ma lea mea e tatau ona fai. Ou te manatua le faatoa laga o le mataupu lena, i le faasee ese o Minisita mai Komiti lea faaletulafono. Ou te manatua ina ua ou tulai mai e avea ma Minisita, sa ou Taitaifono i le NPF ou toe Taitaifono foi i le Faletupe o atinae. E i ai mea na tutupu ai, ua avatu nei le talosaga a Minisita e toa lua. E fia fai a la atinae, e tutusa lelei lava, ai sa talanoa ai i la ituaiga atinae e fai, i atinae i mea tau faatoaga. O le matua galue lava o Minisita nei e toa lua. Ona ave loa lea o le...avatu loa a la talosaga fai i ai suesuega a le tatou Faletupe o atinae. Ae o lea la o le a avane loa i luga o le Komiti, aumai ai fautuaga. E aumai la le fautuaga, ae ua leva ona asiati atu Minisita nei, e tautuana ma talosaga na ia e alofa mai. E le gata ina o atu Minisita ae toe o atu ma la taitoalua ia te au. Ona fai loa lea o le fono, aumai ai loa lipoti. Fai mai lipoti nei a ofisa suesue, o lea e aumai i talosaga a le aualii ia. Pe silia ma le 100 eka ua uma ona ta, ae tetele lava a la loans na talosaga. O lea la ua foi mai le Ofisa e leai lava ma se mea ua taina. O lona uiga la e talapepelo ia talosaga nei. Ma o le fautuaga teena, ia teena ai lava lea. O le mea la ua tupu, o lou sau lava i lea faaape, ua tauuina faasiugutua ai au e Minisita nei ma o la taitoalua, ua le fia talanoa mai ia te au. O i ina na ou lagona ai le faigata o le mea lea, o le Taitaifono o se Minisita. E tele lava le fetotoai i le faatinoaga o le galuega. O le tulaga la na oo i ai, na ou fautuaina loa lea, o le a ou faamavae mai le tausaga 1983, ae tuu pea e faatino e faalapotopotoga, ma o le mea lea e tatau ona i ai ia **statutory boards**. Aua nei faaluafesasiina a latou faaiuga. O le 1983 na ou faamavae mai ai ma le toe taitaifono ai lava se Minisita e tau mai i le taimi lena. Lau Afioga i le Fofoga Fetalai o le tele ia o le mea lena o le **conflict of interest** i le taitaifono o le Minisita. O le ala foi lena e ala ai ona tele le mau fautuaga a tagata atamamai, e fai a latou fautuaga o mea o Faalapotopotoga. O le tele foi o Malo o lea e alu ai i le mea lea. O le mafuaaga lena o lea na alu ai le Kapeneta i le tulaga lea. Ae sau uma lava iinei i le Tulafono e faatu. Ou te manatua i le...ua lata mai le Palota i le 2010, sa debate ai loa le mea lea i

totonu o le Kapeneta ma fai ai loa le iuga. O le a aumai i le tausaga 2011, lea la na aumai ai le Tulafono, lea la e faagasolo ai nei. Ma o le talitonuga foi lene faalauaitele, e alu atu lava faava-o-malo e lelei ona aua nei saofafai ai ni Minisita i i, po o ni sui usufono foi. O le mafuaaga ona o tatou e fetosoaina i mea o talosaga a tagata o le itumalo. E aofia ai la ma le manao i se loan, loan ae faamaonia e sui usufono. Ae iloa lelei lava, e uma loa le faiga palota le toe sao mai le sui usufono, oti atoa ma le faamaoniga, gau ma le Faletupe. O le tulaga la lea o lea e i ai, ma e tataua ona faafiafia loto foi ia outou, aua o le mea lava lene, o le le mafai lava o le faia o se loan a lea tifa mai i le sui usufono. E le o talia gofie le mea lene, ona o le mea lenei, o le sui usufono e uma loa lava uma, ae o le a faapefea ia loans ia na guarantee.

Lau Afioga i le Fofoga Fetalai, e le i faigofie ia faaiuga nei, o le ala lene o lea na faatulaga ai le mea lea. Ao le agaga aumai pea latou mai tua e toatele, tele foi le tomai, e aumai e faanofoia ia sui mai i totonu o faalapotopotoga nei. I le agaga lea, o le a omai latou mai tua, aemaise lava le aufaipisinisi, ona faapea o tama ia e.....se o le matua popoto i le mea o le faipisinisi. Ae o lea lava tatou te iloa, e le o se mea lata mai nei, afioga a lo tatou Alii e tupu lua lava le saito ma le titania, e i ai lava foi tagata lelei, e i ai foi tagata faalelelei. I le vaega lea e omai mai tua, a o faigata na o lea e faafeagainai ma le Minisita, o le suega mai o ni tagata. Aua o isi tagata o le matua lelei lava, o tagata mai tua. A o isi, lau afioga i le Fofoga Fetalai, o le matua le kea, e tusa lava po o mea e soli ai faiga faavae a le Malo, e soli lava. Aemaise la nisi foi lele, o lea e ono fia oso mai i totonu o le tofi, e pei ona faalala ane lea o le mea lene, a le faia le mea lea ona a lea ma a lea. Lau Afioga i le Fofoga Fetalai, se o faafitauli.....o lea tatou te i le lalolagi. O lea tatou te i le lalolagi e tutupu uma ai lava mea faapea, o le ala foi lene o lea e mataalia ai le minsita ma aumai ai lana fautuaga, ua uma foi ona aumai i totonu o le Kapeneta, soalaupule i totonu o le Kapeneta o le mea lea e tataua ona fai. O lea la ua mafua ai ona aumai i totonu o le tatou Palemene nei, a o tulaga o boards nei, o **statutory boards** o komiti e pasia atu e le Palemene lenei. Ne i te i ua galo ia te outou ia le tulaga lene, o komiti uma lava e pasi atu e le Palemene lenei vagana Komiti o Faufautua lea e aumai ai tagata mai tua. O tagata o itumalo o koeiina o le atunuu e o mai e tapa i ai i atinae, aumai le latou fautuaga i atinae ia e fai i tua o le tatou atunuu, e maua mai ai ia i latou nei le tofa mamao ma le faautaga oooo. O lea e manino lava e pei ona tapa ai e toeiina o le nuu o Isaraelu ia Reopoamo, ia fai faiga ia, ia aua nei mamafa lou lima e pei ona mamafa le lima o lou tama o Solomona. Ae fai atu ia Reopoamo, ia ua lelei, ae se i ou tafa foi le fautuaga a taulelea, ae aumai taulelea ae fai mai, leai, ia faamamafa atili lou lima i le pulega o le Malo. Lau Afioga i le Fofoga Fetalai, o le tulaga lene e taua ai tele ia Komiti Faufautua, e aumai toeiina o le atunuu, o la e i ai le tofa mamao e faufautua mai ai i atinae o le atunuu. Ae a oo loa la i mea lavelave ia e mafua ai ona pasia mea o boards nei. E

fai si lavelave te isi, o lea la e ala ai ona faatu le komiti lea. O isi foi lauia la e i totonu o le Komiti latou te vailiilia ia tomai o lea tagata ma lea tagata. Aua o le tele o i latou nei o tagata aoaoina. O lea la e filifili mai i komiti, o lea foi la e manatu le komiti e lelei uma lava latou. Ae faapena foi le mea, e maua foi i tagata aoaoina ia tagata e faamaoni ma isi tagata faaletonuga i le vaega lava lea o le auaoaoina. Lau Afioga i le Fofoga Fetalai, o le tulaga lena o lea e taumafai e faafoefoe atu ai lo tatou Malo ina ia agai i luma. Ae i ai foi le upu lea e masani ona fai e tatou, o le tele o kuka, e tele ai ma tonu faaletonu, ma sau ai ma le taumafa ua faaletonu. O le ala lena o lea ua ae ai le tofa i le Minisita e aumai i totonu lana fautuaga e tuutuu mai i lalo, toe fetuutuunai ia tofiga. O le fale o Samoa e fau tele. O le uiga o lea mea, e pei foi ona saunoa le Taitaifono a le Komiti, o Tupe, o le tele o sulu e maua ai figota. O le ala lena ia tatou faia ia faaiuga nei taua ina ia agai i luma le atunuu. E le faia e le Malo ni faaiuga e leaga ai le atunuu, e faia e le Malo faaiuga ina ia lelei atili ai le atunuu.

FOFOGA FETALAI: Malo. E i ai le manatu ua lava ma totoe le saunoaga a le Palemia, e talifuatai i mea sa laga sui mamalu. Vagana ai e i ai se isi faaopoopoga a lau Afioga i le Minisita, ae ua ou manatu.....

Afioga Hon LAUTAFI FIO SELAFI PURCELL: E le toe i ai se faaopoopoga lau Afioga, o lea ua manino mea uma i lou iloa. Ana silasila le sui usufono mo Salega i le Tulafono, atonu o i ina na te silafia ai, e le o aafia ni liquor board ma ni price control board po o isi boards e pei o lena ua faamalamalama atu i le teuteuga lenei. E ese lava boards ia ese le....o lea ua faamalamalama atu e le Afioga i le Palemia. Ae ua ala ona umi, o le le tilotilo o le sui usufono mo Salega i mea ia e alu atu i le Tulafono Tau Faaofi, lau afioga.

Tofa OLO FITI AFOA VAAI: Lau Afioga i le Fofoga Fetalai, e faapuupuu atu....

FOFOGA FETALAI: Malie le sui usufono, o le a tatou toe alu foi i le ogasami lena.

Tofa OLO FITI AFOA VAAI: O board uma lava na a le Malo, e le ni boards a se isi Faigamalo o board uma a tatou. Ma le faaaloalo.

FOFOGA FETALAI: Malo faafetai. E faapena, o lea ua manino auofala ua saunoa le Taitai o le Malo, e faapena. E i ai le fetuutuunaiga a le Malo e le faapea e tagatasi foi. Malo faafetai i sui mamalu sa saunoa i lenei mataupu, e le gata i le Palemene a o le faafofoga mai o le tatou atunuu.

Na faamaonia le lafo ma faitauina le Tulafono Tau Faaofi o Teuteuga Eseese (Komiti Faatino o Faalapotopotoga a le Malo) 2019 i lona faitauga faalua.

TULAFONO TAU FAAOFI O TEUTEUGA O LE TULAFONO O MEATOTINO TAU LE ATAMAI 2019: faitauga faalua.

FOFOGA FETALAI: Tapa lau Afioga i le Minisita mo Matagaluega mo Pisinisi Alamanuia ma Leipa.

Afioga Hon LAUTAFI FIO SELAFI PURCELL: Lau Afioga i le Fofoga Fetalai, ou te faatu le lafo, *Ina ia faatuina le lafo, ina ia faitauina nei le Tulafono Tau Faaofi o Teuteuga o le Tulafono o Meatotino Tau le Atamai 2019, i lona faitauga faalua, ma ou te fia tautala faamalamalama i ai.*

Faaluaina e le Minisita o Tina ma Tamaitai Atinae o Nuu ma Afioga ma Agafesootai.

FOFOGA FETALAI: Tapa lau Afioga i le Minisita mo lau saunoaga faamalamalama.

Afioga Hon LAUTAFI FIO SELAFI PURCELL: Faafetai i lau Afioga i le Fofoga Fetalai. O le Tulafono lenei o Meatotino tau le Atamai, e teuteu ai le Tulafono Autu 2011. O lenei teuteuga e tolu lava vaega taua o lo o aumai i totonu o le Teuteuga lenei. Ma o nei teuteuga e faamanino atili ai ia aiaiga tau feaatauaiga lea ua ofi atu i ai Samoa i totonu. Aua lava le puipuia lea o tatou meatotino tau le atamai po o le **intellectual properties**. O aiaiga nei e tolu sa sainia i le faaiuga o le tausaga na tea nei, i lalo o le faalapotopotoga o le **World Intellectual Property Organisation po o le WIPO**. Ae ua auai atu ai la Samoa ae, tatau ona faamanino atili le tulafono tumau o lo o i ai nei, e mafai ai ona faatino lelei e Samoa ona sao, ma mafai ai loa ona puipuia meatotino nei tau i le Atamai a lo tatou atunuu, i lalo o faiga faa-malo international. O teuteuga nei ma nei feaatauaiga. O le muamua o le **Hague Agreement**, e puipuia ai meatotino tau le atamai i mea nei o mamamu, po o designs. Lona lua o le **Lisbon Agreement** mo le lesitalaina ma le puipuia o mea patino ia i ai se nuu, ia i ai se vaega e faapitoa i ai, o **Geographical indications**. O le **Patent Cooperation Treaty**, mo le lesitalaina lea o tatou pateni, patents.

O mea nei e tolu, o lea o le a puipuia i lalo o le Tulafono... O le isi suiga tele lau Afioga ia manino ai le Tulafono, e i ai faaupuga o le a tatau ona faaofi atu i totonu o le tatou Tulafono Autu e manino ai ma mafai ai ona tatou auai i faamanuiaga a....aiaiga ua tatou i ai i le lalolagi atoa. O tulaga

lea ua i ai, e mafai na lesitala ua faafaigofie ona lesitala uma tagata e lesitala mai o latou suafa, ona e i ai a latou meatotino e tau i le atamai e manao e puipuia, faapena foi tatou. O le tulaga lea ua i ai, ia tasi lava lau lesitala, cover uma lea o au meatotino tau i le atamai i nuu nei ua i lalo o aiaiga nei, e pei ona ou faalaulau atu. O se taumafaiga lenei lau Afioga ia atili ona puipuia a tatou meatotino tau i le atamai. O le tele o isi mea ua tuai ona tatou pue maia, a o le tele o taumafaiga nei e taumafai atu ai nei, ia mafai ona maua e tatou ma o tatou tagata ia faamanuiaga i mea sa taumafai i latou i le latou atamai. Lau Afioga i le Fofoga Fetalai, o nai teuteuga lava e pei o le upu lea fefaatauaiga, e tataua ona tuu i totonu lava o le Tulafono Autu i taimi uma, le **trademark**, o le taimi nei e pei na o le mark la e i ai i totonu. A sui le Tulafono ona tuu sao lava lea o le faailoga tau fefaatauaiga. Ona malamalama ai lea, ma iloa foi e tagata o le lalolagi, o mea ia ua puipuia i Samoa.

A manatunatu atu i le tausaga atu i tua, sa o tatou pasia ai le Tulafono o le **Madrid** ua totogi foi e tagata tupe i totonu o aiaiga nei, pe a manao e puipuia a latou meatotino tau le atamai i Samoa. O lea ua maua a tatou tupe mai lenei Tulafono. O lea ua amata ona sau tupe ua 90 ma ona tupu afe **euros**. Ae na o le ono ea masina. A manao le tagata e puipuia, e lesitala e totogi foi le latou tupe i totonu e manao e puipuia a latou meatotino tau le atamai, mai le faaaogaina e se tagata iinei i Samoa.

Ia o le tulaga lea lau Afioga e manatu o se Tulafono e taua tele, le agai i luma o le tatou atunuu, o se atunuu e atiae i mea tau fefaatauaiga. Ma o se tulaga e tataua lava ona tatou puipuia, ia e le gata mo tatou nei, ia aemaise foi ia le atiae o manatu ma mafaufauga o e o lo o fai mai i totonu o Kolisi, totonu o Iunivesite, mafaufau latou i mea e mafai ona latou invent ma manufacture ma puipuia i lalo o tatou Tulafono o lo o fai nei.

Ia o se faamalamalama puupuu lea lau Afioga, ma le faaaloalo tele.

FOFOGA FETALAI: Malo faafetai, ia ma e sa lava foi ia le taimi sa talanoaina ai e le tatou semina lenei Tulafono ma lenei Teuteuga. O le mea la lea ua ou manatu o le a tuuina atu loa ia le fesili.

Na faamaonia le lafo ma faitauina le Tulafono Tau Faaofi o Teuteuga o le Tulafono o Meatotino Tau le Atamai 2019 i lona faitauga faalua.

TULAFONO TAU FAAOFI O TEUTEUGA O LE TULAFONO O FAIGA PALOTA 2020 – faitauga faalua

FOFOGA FETALAI: Tapa lau Afioga i le Minisita o Faiga Palota.

Afioga Hon FAAOLESA KATOPAU T. AINUU (Minisita o Faiga Palota): Lau Afioga i le Fofoga Fetalai, ou te faatu le lafo, *Ina ia*

faitauina nei le Tulafono Tau Faaofi o Teuteuga o le Tulafono o Faiga Palota 2020 i lona faitauga faalua ma ou te fia tautala faamalamalama i ai.

Faaluaina e le Minisita o Aoga, Taaloga ma Aganuu ma le Minisita o Fesootaiga, Faamatalaga ma Fesootaiga Vavave Faaneionapo.

FOFOGA FETALAI: Tapa ma le faaaloalo lau Afioga i le Minisita o Faamasinoga.

Afioga Hon FAAOLESA KATOPAU T. AINUU (Minisita o Faiga Palota): Lau Afioga i le Fofoga Fetalai ou te tulai ma le agaga faaaloalo e faamalamalama ia le Teuteuga ua tuuina mai e le Tulafono Tau Faaofi o Faiga Palota 2020.

O nei Teuteuga na tulai mai ina ua maea ia le Faiga Palota laitiiti a le itumalo o Faasaleleaga Nu.2, lea na faatinoina i Tulafono o Faiga Palota 2019, lea sa pasia e le Palemene ia Ianuari 2019. O nisi o Teuteuga na tuuina mai, na afua mai i fautuaga a le Ofisa o le Komisi o Faigapalota ma i latou na faia ia le galuega faifaipea i aso uma.

E 13 ia vaega ua faatino ai ia le Teuteuga lenei, ma e leai se fuafuaga e faapea o le a tolaulauina atu ia nei vaega uma e 13. Ia e i ai ia le manatu maua sa saausi uma ia faaaliga o finagalo o tatou sui usufono mamalu o le Palemene i le tatou i le semina faalauiloa lea sa fai i le Aso Gafua.

Ae na ona ou pai lava i Teuteuga ogaoga ou te lagona e tataua ona silafia e le Palemene. O le Teuteuga lea e taua o le Vaega 3 o lea ua suia ai ia le Vaega 8 o le Tulafono Autu, ua taua ua tuuina atu ia le malosiaga i le Komesina e talia pe teena ai ia le faauluina mai o sui tauva.

E silafia foi i le taimi nei i le Tulafono o Faiga Palota 2019, o lo o tuu i sui tauva e latou te tauavea ia le.. ia pe a manao e le faamalieina ia o latou sui i le agavaa o lea sui tauva ma lea sui tauva. Ae o le Teuteuga lea ua aumai i le taimi nei, o le a aveese mai lena avega mai sui tauva, ae tuu i le Komesina o Faiga Palota e na te faia ia le faaiuga lea. Ma o le agaga tonu lea o lea Teuteuga.

O le Teuteuga lava lea e tasi, o lea foi ua faaulu i ai ma le Teuteuga o le monotaga. O le taimi lenei, i le Tulafono o Faiga Palota 2019, o lo o i ai ia le monotaga i nuu, ma le monotaga i le Ekalesia. Ae o lea ua aumai foi mo se finagalo o le Palemene, pe le tataua ona aveesea ia le requirement o le monotaga faale-ekalesia.

O le mafuaaga o le 1963 sa fafau ai ia le Tulafono lea, sa faaagaga mo sui foi lea o lea sa o i le urban seats. Ae ona o lea ua le toe i ai ia se urban seat, o lea la ua finagalo ai ia le Komesina, e aumai ia le teuteuga, ua lava na o le monotaga faale-nuu, e satisfy ai ia le requirement lea o le monotaga.

O le isi Teuteuga taua, o le faatinoina lea o le oo po o le momoli o le sui ua faamanuia mai i le Faiga Palota. Sa 2 tausaga ia le mea lea sa i ai i le

Tulafono o Faiga Palota i le 2019, ae o lea la ua aumai mo se finagalo o le Maota, pe mafai ona 3. 3 ia tausaga mai i le taimi na maea ai ia le Faiga Palota, ia e tataua ona faatino i totonu o le 3 tausaga lena le oo i le itumalo, pe a faapea e te finagalo e fai lou oo. E le faamalosi ae o le taimi lena e tataua ona faatino ai le oo o le sui usufono.

Ia o le atoaga lena o Teuteuga uma nei e tuu mai i totonu o le Tulafono Tau Faaofi lena o Faiga Palota 2020 mo le silafia e le Maota mamalu.

FOFOGA FETALAI: Malo, ia...

Susuga Hon LAAULI POLATAIVAO LEUATEA: Lau Afioga i le Fofoga Fetalai...

FOFOGA FETALAI: Lea ua tutulai mai sui usufono e saunoa. Se i tulai mai le sui usufono o Gagaifomauga Nu.3.

Susuga Hon LAAULI POLATAIVAO LEUATEA: Faafetai tele i lau Afioga i le Fofoga o le Fono. Faafetai o lea ua toe tuuina mai ia Teuteuga foi lena Tulafono taua, e le na foi ma se laina e pei foi o upu ma tala na fai foi i la tatou Tulafono Autu, ia o le fatu lena o le filifiliga o tatou. O le Tulafono lena e limataitaiina ai ia le filifiliina o sui usufono mamalu o le Palemene.

Ia e le toe natia foi le tulaga lea lau Afioga i le Fofoga Fetalai, na tulai ai lou sui usufono ma faaali ni ou lagona, e ala i le taua o lena Tulafono ma aafiaga o matou i Savaii. Ia e matau atu i le aumaiga o Teuteuga nei, e pei e maua e le o lagona e le Minisita ia o matou mafatiaga. Ae e tau pea ona faaali atu pea, o nai lagona.

O le palota lea na uma atu nei a Faasaleleaga Nu.2, lau Afioga, e 1020 tagata e le i palota, 1020 tagata e le i palota. O le faamaoniga lena lau Afioga o lou tautaualemau, ma lou tatalo i le mea lea o lo matou o i Savaii. Ioe aua o lena lava mea o le felauaiga, feoi, o, nonofo, o aso, ia o atugaluga na lau afioga sa fai atu.

O lea foi ua sao lava ia le tali faaaliali o le mea lea. Ia o le faigata lena mo matou, a faapea nei e 1000 le toatasi o le itumalo lea e tasi, ae 20 sui, o lona uiga, e 20,000 sui e o i Savaii. O matou nei ma nai tagata nei e nonofo i Apia, o le agaga lena sa tuutuu atu ai lava, tuituimalofie, ma ooloolopitovaa i le finagalo o le Afioga i le Minisita, pe te fa le tauala i lea tulaga, ui o lea, e le o i totonu o le Tulafono.

O le Tulafono lea o le monotaga, ia o lea foi ua toe aumai lena mea, ou te taofi e le talafeagai..

Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI: Lau Afioga i le Fofoga Fetalai...

FOFOGA FETALAI: Malie le sui usufono se i tulai mai ia le Palemia.

Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr.

SAILELE MALIELEGAOI: E taua ia o le mea lea o Faiga Palota. Ua ou leiloa o le mea lea e fai nei e le Malo, o le uma o lea Faiga Palota fai ia le Komisi Suesue, fai le Komisi Suesue, se i tau agai tonu lava e saili, po o fea tonu e saili ai ia le mea lea o le amiotonu, ina ia le toe faia ai mea nei o moliaga. E mataga tele le mea lea e tutupu mai i a tatou Faiga Palota, o le uma ae o Faiga Palota, ae faagasolo ia moliaga. Ia ae o le upu lava lea e ave, corruption. O le tele o le le faamaoni ma le fai mea piopio.

O Teuteuga uma lava nei e fai, pe a fua i luga o fautuaga a Komisi Suesue, e tasi lava le agaga lau Afioga, e agai e saili le amiotonu, e taofia ai lea mea lea o le uma o le Faiga Palota ae toe fai ia moliaga.

O mataupu la ia o lea e ala ai ona fai nei mea o suiga. E le o vaai i le tulaga foi lea i se isi lava itu, ae o le vaai i le auala e saili ai ia le amiotonu i le faatinoga o le Palota, ma filifili mai ai ia tagata e tataua ona filifili. Ma e le o se mea e avane ai, o se upu e avane ai, o le uma ane o le Faiga Palota, e fia selau ia palota o la e malo ai ia le sui i Savaii. Ua fai ia latou fiafia, ae e alu atu ia iuga o Faiga Palota iinei, ua faiaina, ae ua fia selau foi ia tagata ia e sili ai ia isi sui.

O le tau suega la o le mea e faamalie ai ia le tulaga lea, o lea e mafua ai. Ae o le ala foi lea e fai ai ia tatou aso malolo, a o le i faia ia tatou Faiga Palota, ina ia lava le taimi e feoi ia vaa ia e ave tagata i Savaii e filifili ia latou palota i Savaii, i tagata ia e fia o i Savaii.

Lau Afioga i le Fofoga Fetalai, afai lava e 2 pe 3 aso e malolo ai, ina ia faatino le mea lea, e tuu e a? E tuu e a? Ae ia o tatou taunuu lava i se taunuu, e soia ia le toe faia o mea ia o le uma o faiga filifiliga ae toe fai ia faiga palota.

Lau Afioga i le Fofoga Fetalai e pei o le agaga lena e tasi. E le o faapea o le leaga o le Minisita, po o le leaga o le Malo e mafua ai ona fai ia mea. Ae tasi lava le agaga, o lea e tatou te taufai saili uma. Po o le a se faiga o le filifilia o sui ma uma ai lava, nai lo o le mea lea o le uma ae fai ia o tatou moliaga, o le matua mataga, aemaise lava o le ave atu o le talaave i fafo, e mafua ona fai ona o le tele o le piopio o sui faatutu.

Lau Afioga i le Fofoga Fetalai, o le mea lena ina ia aua ne i galo, aua ne i galo i ai tatou uma. E le o se agaga e faaleaga ai ia ni tagata e nonofo i Savaii pe nonofo iinei, ae o le agaga ia o tatou saili se auala, ina ia uma le Faiga Palota, ae o lea e ma suigamalie e leai se nofonofo o se isi ae alu toe su se isi.

Susuga Hon LAAULI POLATAIVAO LEUATEA: Lau Afioga i le Fofoga Fetalai, e leai lava se loto e faia. E nau ma le au lava se lagona... ia

ioe, aua e pule lava le Malo o lo o i ai le malosiaga e faatino ai lo outou malosi e faatino ai le Tulafono, ae na ona matou tautau le mau lava e silasila ane e lelava le aso e tasi lea e malolo ai e lau ai matou. O le a matou feosofi ma aau i Savaii. Ae e pei o le agaga lena lau Afioga i le Fofoga Fetalai.

O le isi mataupu lau Afioga, ia o le mea lena o le aveese o saofaga faalelotu. I lou agaga faaaloalo lau Afioga i le Fofoga Fetalai, o le sui usufono e sau i le Maota, e sau ma le atoatoa, o le Ekalesia le isi vaega o le aganuu ma le itumalo. E le mafai ona sausu e na o le fai o lana monotaga i o i le nuu ae tiai ia le Ekalesia. O le itumalo, e aafia ia au mea faale-nuu ma au mea faale lotu, e taua tele ai aua a alu atu ia le sui usufono i Savaii e le faapea e le alu i le lotu. O le a le mea e fai pe a leai se lafolafoga leai se atinae leai se lafoga a tama, e faafefea ona fai? O lona uiga o le a le tauina o le tautua lea?

E na ona ou ololo pitovaa lau Afioga i le Minisita, toe silasila o tatou e o lua ia le aganuu ma le faasamoa. E le mafai ona e sau i i e afa ia le mea e sau ma oe e na o le monotaga faalenuu. E te sau ua fusi atoa ia le Atua ma le aganuu ona atoa lea o lou sui usufono ae e le o se sui usufono afa.

O le isi mea lau Afioga i le Fofoga Fetalai, o mea nei o oo. Lau Afioga ina ne i te i ua faamamafa tele e afioga i sui usufono, ioe leaga o lea ua fai e faatulafono le aso e fai ai. O lau tatalo, se tatala le avanoa, pule le sui usufono pe fai sona oo. Aua foi ne i tuu taimi ina pule lava i le taimi e fai ai. Ia ae e pei ua mamafatu, ae o la lava e i ai le tofa a le sui usufono. O le sui usufono e moni lona alofa i lona itumalo, fai le mea e tatau ona fai. Alu e fai le faaaloalo i le nuu, ae aua le fealoalofai.

Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAO: Lau Afioga i le Fofoga Fetalai...

FOFOGA FETALAI: Ia se i tuu atu le avanoa i le Palemia.

Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAO: Se o le tala lava i le oti ia lena mea o le tuu pea i le sui usufono. O lea e tatou te iloa lelei lava, e tuufau loa ia mea ia o oo, o lona uiga e matua tele le vevesi, ona ua uma ane loa lea e na o tagata lava e malosi ia le tamaoiga e sao mai pe a tuufau.

Ua faafia ona fai ia faamasinoga i nei mea o oo? A tuufau loa mea ia, lau Afioga i le Fofoga Fetalai, e oo ina tau ai le atunuu i le lumanai. O mea ia e tilotilo atu o le isi sui, ae alu atu ia le isi sui malosi, ma talau atu ia... ae fai lava ia mea faapea i fafo o le fale o le sui lea e tamoe. A le taofiofia mea ia, ma le faatulafonoina, e papa ai lava fana i Samoa. O le taumafaiga ina ia

taofiofi ina ia tutusa ia le malosi o latou e lelava le tamaoaiga ae e tele ia lo latou sao mai ia i latou e tele ia le tamaoaiga.

O le tulaga foi i mea ia o monotaga, lau Afioga i le Fofoga Fetalai, a o mai lava tatou e saili mai ia sui usufono o le Fono lenei o le atunuu, fai pea ia monotaga e agai i le tulaga o le aganuu e agai mai ai i le Fono. Ae afai foi o le sailiga o sui e o i le fono i Malua, faaekalesia, ia ona faaaoga lea o monotaga o mea faale-ekalesia, o latou alofa ma a latou taulaga. Ae a tau loa le monotaga, o lea e tatou iloa uma le mea e agai i ai le monotaga.

Ae e le i omai ia ekalesia, o monotaga lava ia o mea faalenuu, tofi ai le sui e sau iinei i le Fono o lo o omai i ai ia sui o nuu uma i Samoa e talanoa mea faale-lalolagi. Ae a oo loa i mea faale-lagi, ia ona talafeagai lava lea o mea o alofa ma taulaga, ia ona o sao lava lea o latou e fai ia mea faale-lagi, ae o mai pea i latou e fai ia mea faale-lalolagi iinei e faaaoga ai ia latou monotaga.

O le agaga atoa lava lenei, aua le faafeliloai fua ia mea e tupu ai le tele o mea e tau fufulu.

FOFOGA FETALAI: Malo, ia ua ou manatu e...

Susuga Hon LAAULI POLATAIVAO LEUATEA: Ua maea ia ou manatu lau Afioga, pau lava lea i lau Afioga i le Fofoga Fetalai, ou te le o faafafinauina ia le mea lea o le campaign e tatala, e leai. O le oo, e te alu lava e fai lou oo. A e alofa i lou itumalo, ma e agaga lelei i le faaaloalo ua aumai e te sapi ai ma e sau e fai upu, e tatau ona fai se faaaloalo. O le agaga lenei o lea sa ou fai atu ai, ae aua faapea e tau taofiofi taimi. A tini loa fai loa, o le agaga lenei e tau avatu.

Susuga Hon TUILAEP AUELUA FATIALOFA LUPESOLIAI LOLOFIETEELE NEIOTI AIONO GALUMALEMANA Dr. SAILELE MALIELEGAOI: Lau Afioga i le Fofoga Fetalai.

FOFOGA FETALAI: Maea le taimi o le sui usufono.

Susuga Hon TUILAEP AUELUA FATIALOFA LUPESOLIAI LOLOFIETEELE NEIOTI AIONO GALUMALEMANA Dr. SAILELE MALIELEGAOI: O le agaga o le sui usufono, e tuufau. E lava le malosi o le sui usufono, o lona uiga a tuufau lava ia le sui usufono lea, o lona uiga e leai lava nisi sui usufono e toe sao mai i lona itumalo.

FOFOGA FETALAI: Ia ua ou manatu e malie le sui usufono, o le a le tuuina atu le avanoa..

Susuga Hon LAAULI POLATAIVAO LEUATEA: Leaga o lea e faafofoga lou itumalo, ou te le o fai atu e tatala oo, o le ou te fai atu e tuu pea i le mea o lea e i ai i le taimi lenei.

FOFOGA FETALAI: Malie le sui usufono se i ou fesoasoani atu, o le uiga lena o le Tulafono. O le uiga lena o le Tulafono ina ia taua pea ia oo, ae e pule lava ia le sui usufono pe fai sona oo pe leai, i le tulaga lena. Ia o le mea la lena ua ou manatu o lenei Tulafono o paeaiga uma lava ma teuteu. E teuteu mai lava i le tausaga muamua e po lava o teuteu.

O le uiga o lea upu e po lava o teuteu, e toetiiti lava oo i le aso o le palota o teuteu lava ma teuteu lava, ona o le manatu ina ia faapena ona talafeagai ma le siosiomaga ina ia ulimasao ia le Faiga Palota aua e so o se taimi lava e fai ai ia le Faiga Palota e mama lava. E auala lava ia finagalo o sui ina ia e aafia i le tulaga o le... e uma ae ae fai faamasinoga.

Ia e pei o le manatu lena o le Malo e tatau lava ona taumafai e teuteu i se tulaga e taoto ai i le lagatonu ia lenei Tulafono. Ma e ua ou faamanatu atu i sui usufono, e fia saunoa uma lava ia sui usufono i le Tulafono lenei ae ou te manatu, o le Tulafono lenei e ave agai i le Komiti, ia o i ina e maua ai ia avanoa o sui usufono uma lava. Ia ma toe aumai lea o tatou talanoaina, ae e pei e faapena se lagona, e afa, ave i le Komiti ia le Tulafono, e sau ai, aua e le faapea e talanoa, talanoa i i ona toe teuteu ai lava lea i i e tatou i i, seiloga e ave i le Komiti ona mafai loa lea ona aumai i totonu ia le lipoti a le Komiti, i le Palemene i lana fonotaga e sosoo ai, ua aumai ai ma lana teuteuga e auala mai i le Komiti.

E pei o ala ia o mea ua ou faamanatu atu. Ae afai tatou te o i le tulaga lea, ia e le mafai foi ona tuumamaina e le Malo, le tulai mai ma faamalamalama atu, le tulai mai ma faamalamalama atu. E pei o le talosaga lea a le nofoa. O afa, ia ae tuu atu ia le fesili ae ave i le Komiti. Ia ona fai lea o teuteuga i o i le Komiti.

Tofa Lealailepule Rimoni Aiafi: Lau Afioga i le Fofoga o le Fono...

Afioga Tafua Maluelue Tafua (Aleipata Itupa i Lalo): Ua leva ona ou tu atu lau Afioga i le Fofoga Fetalai...

FOFOGA FETALAI: Ia se i tulai mai le sui usufono o Faleata..

Tofa LEALAILEPULE RIMONI AIAFI: Ia faafetai tele lava i lau Afioga mo le avanoa. E taua tele le mataupu lea lau Afioga. E le umi foi se manatu ae o le a tuusao loa le manatu i lea vaega. E pei ona e faafofoga i le aso na talanoaina ai lea mataupu, e taua tele.

O lea ua tatou talanoa tonu lava i nominations, o sui tauva. Faafetai tele lava i le Matagaluega ma le afioga i le Minisita ua i ai suiga ia. Aua o suiga

ia na o tatou maua mai i faaletonu i le Palota talu ai, faafetai ua sui i le Palota lenei, ma e i ai vaega ia.

O lea la e faapea mai, o sui tauva, i agavaa o sui tauva. Ae o le mea lea na lava ma fia fai i ai se manatu, o le taimi e faagata ai ia le faaulufaleina o sui tauva, ia le lesitalaina o sui tauva.

Manatua foi lau Afioga, o le Tulafono, lea ua aumai nei, e 6 masina o Setema, e tapuni ai le lola. O le fautuaga la ma se manatu vaivai, e tatau foi ona tapuni ai i i i le aso lea, ma le faalauiloaina o sui tauva ia Setema. O le uiga o le faamatalaga ma se mafuaaga o se manatu, o tatou nei ua fai si tele o palota, faatoa tele lava lesitala i le taimi lea mulimuli, ua latalata i le palota. Ma vevesi solo ai tagata palota ma sui tauva, transfer lea, aumai lea.

O le mafuaaga lau Afioga, o le tele lava o sui e moi o lea e feofeoai solo i tua, ae faatoa faaali lava ia o latou finagalo e fia o, i nai vaiaso mulimuli ia, ona femeiai solo lea ma le mautonu le toatele o tagata.

Peitai ane, afai ae faagata faatasi ia le taimi e lesitala ai tagata ma sui tauva i le masina lea ua tuuina mai e le Matagaluega, o se faigofie lea mo i tatou uma o sui tauva. E manatua foi lau Afioga, o le taimi foi lea i le Tulafono lea ua i ai, o le taimi foi lea e faamavae ese ai ma a latou galuega ma latou uma e faigaluega i le Malo, e fia tauva i le Palota. E faamavae mai i le 6 masina e le i faia ia le Palota. O lona uiga ua agavaa.

O le 6 masina foi lea afai a i ai se isi o tatou e ono aveese lona tofi pe pau lona tofi i lea taimi, e le toe i ai se Bi Election e faia, ae faatali mo le Palota tele.

O mafuaaga ia lau Afioga ou te talitonu, mo tatou uma ma le faanofoina o galuega a le Komiti ma le Matagaluega, e leai lava se faigata o lea mea. Ia ma o le toatele foi o sui, o lea ua tatou iloa ia le tele o sui. Ae ina ia faagata faatasi i le taimi lea ia Setema, ia ona faigofie lava lea o le tatou galuega. Ma le faaaloalo lava.

FOFOGA FETALAI: Ou te le faafuluina ia le finagalo o le sui usufono. Malo faafetai o lea ua maea ia le saunoaga a le sui usufono, ou te le faafuluina lou finagalo. Leaga e sa ia au le mea o le taufaafulu. Ae e ese le manaia o lau saunoaga, e aanoa ia. E tutusa lelei lava lou finagalo ma le loto o le Fofoga Fetalai. Ae faatoa maua avanoa pe a ave i le Komiti. O Komiti e tatou te o uma i ai ma teuteu ia le Tulafono, le Tulafono lenei, ioe.

Ia o lea la ua e malele, malele ma saunoa i ai ae o lea o le a taoto ai faapea. Ae a fono ia le Komiti, ona ave loa lea i ai, ia tatou o i ai e teuteu mai ia le Tulafono. O le ala lena o lea ou te tau faamalulu atu ai i sui usufono o tulai mai. Ia ae malie, e masalo pe toe pau lenei o le sui usufono ona see loa lea i le Komiti e ave i ai.

Se i tulai mai le sui usufono o Aleipata Itupa i Lalo.

Afioga TAFUA MALUELUE TAFUA: Faafetai, faafetai lava i lau Afioga. Ou te tulai atu e faatalofa i lau Afioga i lenei itula o le aso. Malo le onosai. Faafetai foi i le Afioga i le Palemia ma le Kapeneta ia aemaise le paia o sasao nei, le tapuaiga a le atunuu.

E na o le 3 lava nai ou manatu ia e fia faaali atu. O le mea muamua, faafetai mo le Tulafono. E lagolagoina malosi lava lau Afioga i le Minisita. Manaia ia le Tulafono. O so o se Tulafono fou lava ma le... se i toe tuu i tua ia lau faamatalaga, 2006, 2011, ia ma le 2016, o Komisi ia e 3 lea na ou faitau ai. Ou alu foi lea fai lau submission i le Komiti, ae o lea foi ua ou faanoanoa ina ua toe saunoa mai e ave ia le tatou Tulafono i le Komiti, ia o le submission lava e avatu, ia talosia la e talia ia pe afai o lea foi na ave nai au submission i le mea lea na uma nei ae o la na talia le isi vaega ae le i talia le isi vaega. Ae ui o lea, leaga o le process lava e faapena, e usitaia foi lou finagalo.

O le mea na ou tulai atu ai ma le faaaloalo lau Afioga, ua luluta ia le tai. Ua lata ia le tatou Faiga Palota, ae po o le mea lea sa atugalua ai ia lou manatu, o lou lava sui usufono, o lea foi na ou taua i lau lauga o le Tala o le Tupe, o le mea o tagata uma lea ua lesitala uma i lola a sui usufono o itumalo ma... E leai se mea o le a o ai fua e sui ia o latou itumalo ma latou palota pe afai o nonofo i Apia nei. Po o Savaii po o matai o itumalo taitasi, o lea e fia palota mai i o latou itumalo. E pei la o le faataitaiga o au, afai o au sui lea i Apia e 200 pe 300, o tagata o si ou aiga o lou itumalo o la e fia palota i tua, ia e leai se mea o le a o ai fua ia le vaega lea i Apia nei e tauanau o le Tulafono lea ua i ai nei, e sa ona outou palota i tua i Aleipata. Leai faamolemole, afai o faafofoga mai ia sui, ia maua lenei avanoa e unai atu ai ia le vaega lea.

O le mea moni lava ma le mea sao, aua tou te liliu fua pe tou te tuu fua i sui ia e tamomoe i Faleata ma i inei i le Vaimauga. Palota pea outou i Aleipata, i le mea o lo o sau ai ia le talo ma le niu, e tausii ai ia o tatou aiga i Apia nei. Ia o le mea lenei na ou tulai atu ai lau Afioga, o le tulaga i mea o le oo ma a uma na mau mea, ia e pule lava ia le sui usufono ia. Pe fai sona oo pe leai. O le mea foi e le faamalosi. Ia o le tagata lava ia e toaga i le lotu, ma toaga i mea faale-nuu, ia o la foi e silafia e le itumalo. Ia manuia le Fono.

FOFOGA FETALAI: Malo..

Afioga SULAMANAIA FETAIAI TAUILILI TUIVASA: Lau Afioga i le Fofoga Fetalai e...

Tofa NAFOITOA TALAIMANU KETI: Lau Afioga i le Fofoga Fetalai...

FOFOGA FETALAI: Se i saunoa mai ia le Sui Fofoga Fetalai...

Susuga Hon TUILAEP AUELUA FATIALOFA LUPESOLIAI LOLOFIETEELE NEIOTI AIONO GALUMALEMANA Dr. SAILELE MALIELEGAOI: Lau Afioga i le Fofoga Fetalai...

FOFOGA FETALAI: Saunoa mai le Palemia.

Susuga Hon TUILAEP AUELUA FATIALOFA LUPESOLIAI LOLOFIETEELE NEIOTI AIONO GALUMALEMANA Dr. SAILELE MALIELEGAOI: E pau lava le mea ou te talanoa atu ai, e manaia tele lou finagalo. O nei mea, e alu uma lava i o i le Komiti, ona fai ai lea o teuteuga, ona toe aumai foi lea e tatou te tilotilo i ai, ae e pei o lea o le a faaoga ia lo tatou Maota nei, e fai atu ai ia campaign i tagata e o e lesitala. E na o le pau lena o le mea lea e pei o campaign lea ia o le a alu atu e le i taitai.

FOFOGA FETALAI: E ala la ona ou fautua atu, o le mea tonu lava lea e saunoa i ai ia le toeaina. Ioe, se ua popoto foi ia nai toeaia i tua. E te fiu lava e lauga faatosina atu i nei, ae a e le faafiafia lava i nai toeaia e leai e le... ioe e a pe a faapea se i tuu atu lava le avanoa i le afioga i le Sui Fofoga Fetalai, ia ona tuu atu loa lea o le fesili ona ave loa lea i le Komiti ae o tatou o i ai e afua mai ai ia teuteuga. Ia se i saunoa lau afioga i le Sui Fofoga Fetalai.

Tofa NAFOITOA TALAIMANU KETI: Faafetai i le avanoa ua tuuina mai e le Nofoa. O avanoa faaauo e seasea maua leaga e sui le sema i nisi o taimi. Ae o laolao faapenei se i tau faafofoga foi si ou itumalo o la e tapuai mai, ua ou vaavaai atu i le facebook lea e live ai ia le tatou Fonotaga, o la e fesiligia e nisi o lou itumalo, o fea ea ia lo matou sui usufono?

Ae tali nisi o sui mamalu o lo matou itumalo, e te le o faafofoga atu lava i le leo o le tamaloa o la e taitaiina le Fono?

Lau Afioga i le Fofoga Fetalai, o se aneanea ma ni lagona molipo e fia faaleo aua lenei Tulafono. O le Tulafono foi e le faigofie i lenei itumalo aemaise o matou o sui usufono mai Salafai.

Lau Afioga i le Fofoga Fetalai, ina ua tau amata ia lenei Tulafono, o le agaga maua ma le gao sa faaleo ai ia mea uma, corruption. Na ala ai ona silasila ina ia toe lauililiu ma se i toe silasila i le tulaga, se i aveese ai ma ia amiotonu ai faatinoga o faiga filifiliga i Taitai o le atunuu.

Faafetai i lau Afioga i le Minisita, o lea ua faafofoga ma le totoa, i le tulaga o le amanaia o nisi o fautuaga e 22, na tuuina atu. O lea e faasea isi sui usufono po o fea o i ai a latou fautuaga na o atu ai e fautua i le Komiti mo le faamoemoe o le Tulafono lenei. Peitai ua uma ona ou faaalua i ai, o le tali e le talia. O lea la ua aumai i lenei taeao, e tolu lava mea ua talia, o le monotaga ma mea ia na e faailoa nei. E momoli atu le faafetai tele, o le

agaga lea sa taumafai atu ai le Komiti, se i toe silasila i ai i le tulaga o le Tulafono lenei, leaga e aafia ai le aia, le aia faaletagata ma le aia faaeleele, le aia tau toto. O le agaga maualuga lea sa fesoasoani atu ai, leaga o faiga filifiliga e fai i le toto ma le iu nisi o tulaga.

E tolu lava ni nai mea na ona ou faailoa lua Afioga i le Fofoga Fetalai ou te toe fia faailoa, faafetai tele i le sui usufono mo Faleata. O lagona na, o manatu foi na. Ae toe fia faaopoopo i le Vaega 8, a toe silasila i ai, ua tulaga matagofie, ma o lea foi ua i ai ma fautuaga. A o le toe fia fesoasoani atu i le tulaga lea o le umiaina o le suafa matai, i le tulaga o le agavaa e tauva ai sui tauva i le faiga palota. Silasila a outou Afioga, e lima tausaga o le Paeaiaga o se sui ua tulai mai. O le agaga maualuga o le Komiti na tuuina atu ai le fautuaga, ia lima foi tausaga e umia ai e se sui fia tauva le suafa matai e fai ma sui tauva, agavaa, eligibility ina ia atagia ai le faamoemoe e fia tauva e fai ma taitai o lona itumalo, e sui lona itumalo i le Maota lenei. Peitai o lea tatou te o i le tolu tausaga i le taimi nei. A tulai mai le sui usufono ma fai ma fofoga o le itumalo i le Fonousu a le Palemene, e lima tausaga e tautua ai, lima. O le ala lea sa taumafai ai ina ia ogatasi lava le futia ma le umele i le tulaga o agavaa o se tagata. E le afaina, o le aiatatau o le mea lena a le tagata soifua, a o le soifua tautua, ia taga tutusa ma tumuai tutusa i le tulaga o le fia ofoina o le ola e tautua ai le itumalo. Na pau lava lena o se vala laitiiti lau Afioga.

O lona lua, o le tulaga lava lea o le faatosina. Sa i ai foi se tuualalo ma fai nai suesuega, o le mea lea o lea e faatino i Malo Temokarasi, Niu Sila ma Ausetalia. O le tulaga o le faatagaina o se vaegatupe mo le sui tauva aua la tapenaga o campaign. O le upu moni lava e le natia i lalo, e le lilo foi, e i ai lava fuafuaga faapea e tataua ona faatino, lea sa tuuina atu ai sa matou tuualalo, ona o le agaga lava lea o lea tatou te... ioe, e le alu ese se manatu o lenei itumalo i le tulaga ina ia amiotonu ma sao le faiga o filifiliga. O le upu moni lava lena o lea e tuli, ma ia tasi le palota a le tagata, one vote. O le agaga lena e tuuina atu i lau Afioga sa matou fautuaina ai, pe ni a fa au...

FOFOGA FETALAI: Ia se i tulai mai le Minisita mo Aoga, Taaloga ma Aganuu.

Afioga Hon Loau Solamalemalo Keneti Sio (Minisita mo Aoga, Taaloga ma Aganuu): Lau Afioga i le Fofoga Fetalai, o lea ua ou matau atu lava foi, e le fia faalavelaveina, o le sui usufono o lo o saunoa nei o le Taitaifono o lo o faapena ona iloilo ina le Tulafono pe a oo atu i ai. Ne i umi naua lana saunoaga, ae pule lava ia. E sui mai lava e ia i o i lana Komiti. Ma le agaga faaaloalo leaga o lea ua ta le tasi.

Tofa NAFOITOA TALAIMANU KETI: Lau Afioga i le Fofoga Fetalai, e le i natia le vala lea i le tautalaga a le sui usufono mamalu. Sa ou faailoa ona o tulaga e sui le sema ma tulaga faapena, e le iloa se taimi. A o

le agaga e maua le laolao, tau lava ina ou faailo aneanea ia ma manaoga molipo a o lena e i ina le tofa. O lena e i ina le uta ma le moe. E ui foi ina matou avatu faafautuaga i le Komiti, e leai lava so matou loto e faia. E faapefea la ona faaleo? O le agaga lena o lea e taumafai atu ai lau Afioga i le Minisita mo Aoga, ae tumu i le faaaloalo, e tumu i le migao. E \$50,000 sa faatuina atu ma fautuaina ai, e faataga. A o le agaga, a uma ona fai lea o le lipoti i lona faaaogaina pe a uma le palota i le Komesina o Faiga Palota.

O le isi itu e fia taua e tuuina atu i lenei vaega o le aso, o information ia e molia ai tatou. Lea na saunoa nei lava le Taitai o le Malo, mea o le mataga, toe fetauai, ae sue atu i charges foi lea, e 16 charges o le isi toeaina ae na o le \$10 le isi charge. O mea faapea o lea e tau avatu ai, e le tataua ona atagia ia mea pe a i ai se seleni e atofa aua mea ia, e avoid ai tulaga uma faapea. O le mea lea matou te avatu ai faafautuaga, ioe, o lea e toe foi mai i le Komiti. A o lea ou te manatua i lena po na fai ai le fonotaga, na ona tuu atu o a matou fautuaga, a sau lava le tali e leai, e faapefea ona faailoa i le atunuu lagona o le Komiti lenei? O le agaga lena. E ui o lea, e ava tele i le Nofoa, e ava tele i lau Afioga ma lena itu, ae o lo o tele pea ni manatu e fia tuuina atu. Ae a aumai i le Komiti, o le a toe faafofoga i ai lau Afioga i le Minisita ma le Komesina o Faiga Palota. Faafetai mo le avanoa.

FOFOGA FETALAI: Ia o le mafuaaga lea, o le aotelega lena o le finagalo o le Afioga i le Sui Fofoga Fetalai po o le Taitaifono o le Komiti ina ia lafo mai i le Komiti le faatuatuaga se i silasila totoa i ai ona aumai lea o se latou fautuaga ua faamalieina finagalo o sui usufono mamalu.

Afioga Sulamanaia Fetaiai Tauilili Tuivasa (Vaimauga Sasae): Lau Afioga i le Fofoga Fetalai pe maua se avanoa, ona sa ma tulai faatasi atu ma lau Sui Fofoga Fetalai a o lea ua ave lau faaaloalo i le... Pe maua se...

FOFOGA FETALAI: Ua ou manatu o le tele foi o taimi ta te fetuunai e te malo lava i lau faaaloalo, ae faapea ai ou te malo nei i le taua va faale-Vaimauga, ae tuu atu ia ae alofa e faapuupuu mai.

Afioga SULAMANAIA FETAIAI TAUILILI TUIVASA: Ia, o le agaga o lenei sui usufono....

FOFOGA FETALAI: Ou te faamalulu atu i le sui usufono mamalu. Ona o lea ua tatou toai taunuu i le tatou... Ioe, ua e silasila la i ai i mafuaaga o lea e feagai ma le Nofoa? Ae ui i lea, se i tapa se lafo a le Afioga i le Palemia e faauma ai lau saunoaga ma faaaau ai le tatou galuega.

LAFO MO LE FAAAUAUINA O ITULA FONO

Susuga Hon TUILAEP AUELUA FATIALOFA LUPESOLIAI LOLOFIETEELE NEIOTI AIONO GALUMALEMANA Dr. SAILELE MALIELEGAOI: Lau Afioga i le Fofoga Fetalai, ua matau atu ua lata i le tatou taimi manava, ae o lo o i ai nisi o Tulafono e ao ona iloilo auiliili. Ou te faatu ai le lafo, *Mo le suia o itula Fono e faapea, faaauau taualumaga a le Fono Aoao i le aoauli nei i le aumai loa o le Fesili e pasia ai le Tulafono lea ae tatou agai atu loa e iloilo auiliili ma faitau faatolu Tulafono Faanatinati ona tolopo ai lea o taualumaga a le Fono Aoao.*

Faaluaina e le Aiga Kapeneta.

Na faamaonia le lafo.

FOFOGA FETALAI: Ua ou manatu o lea ua e faafofoga mai, ua see foi le vaa o lou uso faale-Vaimauga. Ona faapea lea, a malu lava i fale ua malu foi i fafo i le taua va tootoo. Ae o le a tuuina atu loa le fesili ona o lea sa aafia i le lafo.

Afioga Sulamanaia Fetaiai Tauiliili Tuivasa: Lau Afioga i le Fofoga Fetalai e ava tele. Na pau lava le agaga sa ou fia tulai atu ai, o le agaga, ua ou faamagaloa le Minisita lea. O le agaga lena sa fia fesoasoani atu ai ma ou tulai atu ai ona o le tulaga i le mataupu i le Minisita lea. O le tatalo la sa avatu e le Vaimauga lau Afioga i le Fofoga Fetalai, ona o le masina lea o lea e faauma ai le mea lea e tau o le transfer. O le agaga la ne i te i ua toe tuu atu i le Komiti.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai o lea ua uma ona faatu le lafo ma ua pasia le lafo.

FOFOGA FETALAI: Ia ua lelei. A foi o mea uma lava ia o lea o le a sau nei i le fautuaga a le Komiti. Ioe. O mea uma na o lea o le a sau i le fautuaga a le Komiti. Ae ona o lea ua pasia le lafo, o le a tuu atu le fesili.

Na faamaonia le lafo ma faitauina le Tulafono Tau Faaofi o Teuteuga o le Tulafono o Faiga Palota 2020 i lona faitauga faalua.

FOFOGA FETALAI: E tusa ai ma Tulafono Tumau, o le a tuuina atu le Tau Faaofi i le Komiti o Tulafono Tumau, Mataupu tau Faiga Palota, Talosaga ma Tofiga faale-Faavae mo le iloilo ma toe lipoti mai i le Fono Aoao i se fonotaga o lumanai.

**TULAFONO TAU FAAOFI O TEUTEUGA O LE TULAFONO O LE
PULEGA O TUPE A LE MALO 2019 – iloiloga auiliili**

FOFOGA FETALAI: E tusa ai ma Tulafono Tumau e amata le iloiloga auiliili i le Fuaiupu 2.

FUAIUPU 2: Ua teuteuina le fuaiupu 34.

Faamaonia.

FUAIUPU 1 MA LE IGOA

Fuaiupu 1: Igoa puupuu ma le amataga.

IGOA: Teuteuga o le Tulafono o le Pulega o Tupe a le Malo 2019.

FOFOGA FETALAI: O lo o i ai le Faasaoga a le Minisita i le Fuaiupu 1 ma le Igoa.

Tulai mai le Afioga i le Minisita.

Afioga Hon SILI EPA TUIOTI: Lau Afioga i le Fofoga Fetalai ou te faatu le Faasaoga i le Fuaiupu 1 ma le Igoa o le Tulafono e faapeaL

“FAASAOGA:

Ia aveese le fuainumera 2019 ma suia i le fuainumera 2020 ma faitauina ai le Igoa o le tulafono e faapea:-

Teuteuga o le Tulafono o le Pulega o Tupe a le Malo 2020.”

Faamaonia le Faasaoga.

Faamaonia le Fuaiupu 1 ma le Igoa e pei ona Faasaoina.

Na faagasolo le Tulafono Tau Faaofi o Teuteuga o le Tulafono o le Pulega o Tupe a le Malo 2020 faatasi ma le Faasaoga.

**TULAFONO TAU FAAOFI O TEUTEUGA O LE TULAFONO O LE
FAAFOEGA O LAFOGA (POLOKALAME FAA-ELETORONI
2019) - iloiloga auiliili**

FOFOGA FETALAI: E tusa ai ma Tulafono Tumau e amata le iloiloga auiliili i le Fuaiupu 2.

FUAIUPU 2: Ua faaofiina le fuaiupu 29A fou.

Faamaonia.

FUAIUPU 1 MA LE IGOA

FUAIUPU 1: Igoa puupuu ma le amataga.

**IGOA: Teuteuga o le Tulafono o le Faafoega o Lafoga
(Polokalame Faa-Eletoroni) 2019.**

FOFOGA FETALAI: O lo o i ai le Faasaoga a le Minisita i le Fuaiupu 1 ma le Igoa.

Tulai mai le Afioga i le Minisita mo Tupe maua.

Afioga Hon TIALAVEA FEA LENIU TIONISIO HUNT: Lau Afioga i le Fofoga Fetalai ou te faatu le Faasaoga i le Fuaiupu 1 ma le Igoa e faapea:

“FAASAOGA:

Ia aveese le fuainumera 2019 ma suia i le fuaiupu 2020 ma faitauina ai le Igoa o le Tulafono e faapea:

Teuteuga o le Tulafono o le Faafoega o Lafoga (Polokalame Faa-Eletoroni) 2020.”

Faamaonia le Faasaoga.

Faamaonia le Fuaiupu 1 ma le Igoa e pei ona Faasaoina.

Na faagasolo le Tulafono Tau Faaofi o le Teuteuga o le Tulafono o le Faafoga o Lafoga (Polokalame Faa-Eletoroni) 2020 faatasi ma le Faasaoga.

TULAFONO TAU FAAOFI O TEUTEUGA O LE TULAFONO O MALOSIAGA O LEOLEO 2019 – iloiloga auiliili

FOFOGA FETALAI: E tusa ai ma Tulafono Tumau e amata le iloiloga auiliili i le Fuaiupu 2.

FUAIUPU 2: Ua faaofiina le fuaiupu 36BA fou.

Faamaonia.

FUAIUPU 3: Soloaiga.

Faamaonia.

FUAIUPU 1 MA LE IGOA

FUAIUPU 1: Igoa puupuu ma le amataga.

IGOA: Teuteuga o le Tulafono o Malosiaga o Leoleo 2019.

FOFOGA FETALAI: O lo o i ai le Faasaoga a le Minisita i le Fuaiupu 1 ma le Igoa o le Tulafono.
Tulai mai le Afioga i le Palemia.

Susuga Hon TUILAEPA AUJUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI: Lau Afioga i le Fofoga Fetalai ou te faatu le Faasaoga i le Fuaiupu 1 ma le Igoa e faapea:-

“FAASAOGA:

Ia aveese le fuainumera 2019 ma suia i le fuainumera 2020 ma faitauina ai le Igoa o le Tulafono e faapea:

Teuteuga o le Tulafono o le Malosiaga o Leoleo 2020.”

Faamaonia.

**TULAFONO TAU FAAOFI O TEUTEUGA O LE TULAFONO O
FESOOTAIIGA 2019
- iloiloga auiliili**

FOFOGA FETALAI: E tusa ai ma Tulafono Tumau e amata le iloiloga auiliili i le Fuaiupu 2.

FUAIUPU 2: Ua teuteuina le Fuaiupu 8.

Faamaonia.

FUAIUPU 3: Teuteuga faatupulaia.

Faamaonia.

FUAIUPU 4: Aiaiga faasaoina.

Faamaonia.

FUAIUPU 1 MA LE IGOA

FUAIUPU 1: Igoa puupuu ma le amataga

IGOA: Teuteuga o le Tulafono o Fesootaiga 2019.

FOFOGA FETALAI: O lo o i ai le Faasaoga a le Minisita i le Fuaiupu 1 ma le igoa.

Tulai mai le Afioga i le Minisita.

Afioga Hon AFAMASAGA LEPUIAI RICO TUPAI: Lau Afioga i le Fofoga Fetalai ou te faatu le Faasaoga i le Fuaiupu 1 ma le Igoa e faapea:-

“FAASAOGA:

Ia aveese le fuainumera 2019 ma suia i le fuainumra 2020 ma faitauina ai le Igoa o le Tulafono e faapea:

Teuteuga o le Tulafono o Fesootaiga 2020.”

Faamaonia le Faasaoga.

Faamaonia le Fuaiupu 1 ma le Igoa e pei ona Faasaoina.

Na faagasolo le Tulafono Tau Faaofi o Teuteuga o le Tulafono o Fesootaiga 2020 faatasi ma le Faasaoga.

**TULAFONO TAU FAAOFI O TEUTEUGA ESEESE (KOMITI
FAATINO O FAALAPOTOPOTOGA A LE MALO) 2019 – iloiloga
auiliili**

FOFOGA FETALAI: E tusa ai ma Tulafono Tumau e amata le iloiloga auiliili i le Fuaiupu 2.

FUAIUPU 2: Teuteuga i le Tofiaina ma le Faatulagaina o Komiti Faatino o Faalapotopotoga a le Malo.

Faamaonia.

FUAIUPU 3: Teuteuga faatupulaia.

Faamaonia.

FUAIUPU 4: Aiaiga tau soloaiga ma aiaiga faasaoina.

Faamaonia.

FUAIUPU 1 MA LE IGOA

FUAIUPU 1: Igoa puupuu ma le amataga.

IGOA: Tulafono o Teuteuga Eseese (Komiti Faatino o Faalapotopotoga a le Malo) 2019.

FOFOGA FETALAI: O lo o i ai le Faasaoga a le Minisita i le Fuaiupu 1 ma le Igoa.

Tulai mai le Afioga i le Minisita.

Afioga Hon LAUTAFI FIO SELAFI PURCELL: Lau Afioga i le Fofoga Fetalai ou te faatu le Faasaoga i le Fuaiupu 1 ma le Igoa e faapea:-

“FAASAOGA:

Ia aveese le fuainumera 2019 ma suia i le fuainumera 2020 ma faitauina ai le Igoa o le Tulafono e faapea:-

Tulafono o Teuteuga Eseese (Komiti Faatino o Faalapotopotoga a le Malo) 2020.

Faamaonia le Faasaoga.

Faamaonia le Fuaiupu 1 ma le Igoa e pei ona Faasaoina.

Na faagasolo le Tulafono Tau Faaofi o Teuteuga Eseese (Komiti Faatino i Faalapotopotoga a le Malo) 2019 faatasi ma le Faasaoga.

TULAFONO TAU FAAOFI O TEUTEUGA O LE TULAFONO O MEATOTINO TAU LE ATAMAI 2019 – iloiloga auiliili

FOFOGA FETALAI: E tusa ai ma Tulafono Tumau e amata le iloiloga auiliili i le Fuaiupu 2.

FUAIUPU 2: Ua teuteuina le faatulagaga o aiaiga ma le igoa umi.

Faamaonia.

FUAIUPU 3: Ua teuteuina le fuaiupu 2.

Faamaonia.

FUAIUPU 4: Ua faaofiina le fuaiupu 3A fou.

Faamaonia.

FUAIUPU 5: Ua faaofiina le fuaiupu 18A fou.

Faamaonia.

FUAIUPU 6: Ua suia le fuaiupu 31.

Faamaonia.

FUAIUPU 7: Ua teuteuina le fuaiupu 44.

Faamaonia.

FUAIUPU 8: Ua faaofiina fuaiupu fou 44A, 44B, 44C ma le 44D.

Faamaonia.

FUAIUPU 9: Ua teuteuina le ulutala o le Vaega 5, o fuaiupu 45 e oo i le 48.

Faamaonia.

FUAIUPU 10: Ua teuteuina le fuaiupu 49.

Faamaonia.

FUAIUPU 11: Ua teuteuina le fuaiupu 50.

Faamaonia.

FUAIUPU 12: Ua teuteuina fuaiupu 52 e oo i le 54.

Faamaonia.

FUAIUPU 13: Ua teuteina le fuaiupu 55.

Faamaonia.

FUAIUPU 14: Ua teuteuina le fuaiupu 56 e oo i le 59.

Faamaonia.

FUAIUPU 15: Ua teuteuina le fuaiupu 60.

Faamaonia.

FUAIUPU 16: Ua suia le fuaiupu 83.

Faamaonia.

FUAIUPU 17: Ua soloia le fuaiupu 84.

Faamaonia.

FUAIUPU 18: Ua suia le fuaiupu 86.

Faamaonia.

FUAIUPU 19: Ua suia le Fuaiupu 87.

Faamaonia.

FUAIUPU 20: Ua teuteuina le fuaiupu 88.

Faamaonia.

FUAIUPU 21: Ua teuteuina le fuaiupu 89.

Faamaonia.

FUAIUPU 22: Ua teuteuina le fuaiupu 93.

Faamaonia.

FUAIUPU 23: Ua teuteuina le fuaiupu 97.

Faamaonia.

FUAIUPU 24: Ua teuteuina le fuaiupu 101.

Faamaonia.

FUAIUPU 25: Ua faaofiina fuaiupu fou 102A e oo i le 102G.

Faamaonia.

FUAIUPU 26: Ua teuteuina fuaiupu 113, 116, 118, 124 ma le 126.

Faamaonia.

FUAIUPU 27: Ua teuteuina le fuaiupu 137.

Faamaonia.

FUAIUPU 28: Ua teuteuina le fuaiupu 140.

Faamaonia.

FUAIUPU 29: Ua soloia le Faamatalaga 3.

Faamaonia.

FUAIUPU 30: Teuteuga lautele i le Tulafono.

Faamaonia.

**FUAIUPU 31: Teuteuga faatupulaia i le Tulafono o le Ofisa o Tiute
2014.**

Faamaonia.

FUAIUPU 1 MA LE IGOA

FUAIUPU 1: Igoa puupuu ma le amataga.

IGOA: Teuteuga o le Tulafono o Meatotino Tau le Atamai 2019.

FOFOGA FETALAI: O lo o i ai le Faasaoga a le Minisita i le Fuaiupu 1 ma le Igoa.
Tulai mai le Afioga i le Minisita.

Afioga Hon LAUTAFI FIO SELAFI PURCELL: Lau Afioga i le Fofoga Fetalai ou te faatu le Faasaoga i le Fuaiupu 1 ma le Igoa e faapea:

“FAASAOGA:

Ia aveese le fuainumera 2019 ma suia i le fuainumera 2020 ma faitauina ai le Igoa o le Tulafono e faapea:

Teuteuga o le Tulafono o Meatotino Tau le Atamai 2020.”

Faamaonia le Faasaoga.

Faamaonia le Fuaiupu 1 ma le Igoa e pei ona Faasaoina.

Na faagasolo le Tulafono Tau Faaofi o Teuteuga o le Tulafono o Meatotino Tau le Atamai 2020 faatasi ma le Faasaoga.

TULAFONO TAU FAAOFI O TEUTEUGA O LE TULAFONO O LE PULEGA O TUPE A LE MALO 2020 – faitauga faatolu

FOFOGA FETALAI: Ou te tapa lau Afioga i le Minisita o Tupe.

Afioga Hon SILI EPA TUIOTI: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o le Pulega o Tupe a le Malo 2020 i lona faitauga faatolu.*

Faaluaina e le Minisita mo Aoga, Taaloga ma Aganuu ma le Minisita mo Tupe Maua.

Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoao Faitulafono.

**TULAFONO TAU FAAOFI O TEUTEUGA O LE TULAFONO O LE
FAAFOEGA O LAFOGA (POLOKALAME FAA-ELETORONI)
2020 – faitauga faatolu**

FOFOGA FETALAI: Ou te tapa le Afioga i le Minisita o Tiute ma Tupe Maua.

Afioga Hon TIALAVEA FEA LENIU TIONISIO HUNT: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o le Faafoega o Lafoga (Polokalame Faa-Eletoroni) 2020 i lona faitauga faatolu.*

Faaluaina e le Minisita o Tupe ma le Minisita mo le Soifua Maloloina.

Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoao Faitulafono.

**TULAFONO TAU FAAOFI O TEUTEUGA O LE TULAFONO O
MALOSIAGA O LEOLEO 2020 – faitauga faatolu**

FOFOGA FETALAI: Tulai mai lau Afioga i le Palemia.

**Susuga Hon TUILAEP AUELUA FATIALOFA LUPESOLIAI
LOLOFIETELE NEIOTI AIONO GALUMALEMANA Dr.
SAILELE MALIELEGAOI:** Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Malosiaga o Leoleo 2020 i lona faitauga faatolu.*

Faaluaina e le Minisita mo Pisinisi, Alamanuia ma Leipa.

Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoao Faitulafono.

**TULAFONO TAU FAAOFI O TEUTEUGA O LE TULAFONO O
FESOOTAIIGA 2020 – faitauga faatolu**

FOFOGA FETALAI: Ou te tapa le afioga i le Minisita mo Fesootaiga.

Afioga Hon AFAMASAGA LEPUIAI RICO TUPAI: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Fesootaiga 2020 i lona faitauga faatolu.*

Faaluaina e le Minisita mo Aoga, Taaloga ma Aganuu ma le Minisita mo Faamasinoga ma Pulega tau Faamasinoga.

Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoaofa Faitulafono.

**TULAFONO TAU FAAOFI O TEUTEUGA ESEESE (KOMITI
FAATINO O FAALAPOTOPOTOGA A LE MALO) 2020
– faitauga faatolu**

Afioga Hon LAUTAFI FIO SELAFI PURCELL: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga Eseese (Komiti Faatino o Faalapotopotoga a le Malo) 2020 i lona faitauga faatolu.*

Faaluaina e le Sui Palemia ma le Minisita mo Galuega, Felauaiga ma Atinae Eseese.

Na faamaonia le lafo ma faitauina le Tulafono Tau Faaofi lona faitauga faatolu ma faapea ona pasia le Fono Aoaofa Faitulafono.

**TULAFONO TAU FAAOFI O TEUTEUGA O LE TULAFONO O
MEATOTINO TAU LE ATAMAI 2020 – faitauga faatolu**

FOFOGA FETALAI: Ou te tapa lau Afioga i le Minisita mo Faalapotopotoga Tumaoti a le Malo.

Afioga Hon LAUTAFI FIO SELAFI PURCELL: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Meatotino Tau le Atamai 2020 i lona faitauga faatolu.*

Faaluaina e le Sui Palemia ma le Aiga Kapeneta.

Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoaofa Faitulafono.

FOFOGA FETALAI: Malo faafetai i le paia o le tatou Palemene i le afio o lau Afioga i le Palemia ma le Sui Palemia, le mamalu i le Kapeneta aemaise o Taitaifono, e faapea foi le mamalu i sui usufono filifilia o le atunuu e ala i tofi faipule. E faapea foi le taputapu mai a Ofisa Sili o Pulega o Matagaluega eseese ma Faalapotopotoga a le Malo aemaise foi o

le faafofoga mai a le atunuu. Ia ua maea le tatou galuega. Ou te tapa se finagalo o le Palemia pe i ai se isi galuega o totoe ae faapena ona faimea faalogo le Maota.

SAUNOAGA A LE PALEMIA MA LE LAFO MO LE TOLOPOINA

Susuga Hon TUILAIPA AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI: Lau Afioga i le Fofoga Fetalai, o le a avea ia lenei avanoa ou te momoli atu ai le faamalo ma le faafetai i lau Afioga i le Fofoga Fetalai i lou onosai ma lou faapalepale i nei aso sa tatou Fono ai, tainane foi le mamalu o sui usufono mamalu o le Maota nei i lo outou sao taua i galuega tetele sa faafeagai ma tatou. E faapea foi le tapuaiga i Ofisa Sili o Pulega o Matagaluega ma Faalapotopotoga o lo o tatou faatasi ma auai i le Fono lenei.

O le tausaga e 1984, na fai ai le iugafono a le Kapeneta tusa ua 36 tausaga talu ai ina ia auai Ofisa Sili o Pulega. E le o ia i matou le atoatoa o mea uma sa outou fautua mai ai, o outou o Taitai o le atunuu, e leai nisi o toe aisili, o lea ua atoa i le Maota lenei le tatou atunuu atoa, i le tele o a outou fautuaga sa tuuina mai. O le mafuaaga lea ua ala ai ona afifio mai Ofisa Sili o Pulega latou te faalogo, latou matau ma latou faamaumau outou finagalo faaalua ma aumai le latou faamanatu i le Malo e tataua ona faatinoga ma faapea ona faasoasoa mai ai seleni e mafai ona maua aua le faatinoga o outou finagalo, o outou o tootooau, tootoo sinasina, o lea lava ua i o outou tauau mamalu faalupelupe o outou itumalo.

Ou te faamalo foi i le tapuaiga a Lana Afioga Mamalu Le Ao o le Malo, le Sui Tofia tainane le faafogafoga mai a le paia i Aiga ma latou Tama, o Tama ma o latou Aiga. E faapea foi le faafogafoga mai a le paia ia Aiga ma latou Tama, o Tama ma latou Aiga. E faapea foi le Usoga a Tumua ma Puleono i Salafai, ae a le faanonogamanu a le aufaigaluega paia a le Atua o lo o le mapu i le talosiaina o le tatou atunuu aemaise foi o tatou faiva ina ia faatupu manatu i le Malo aua faamoemoega lelei mo le soifua au i luma o le tatou atunuu. O le a foi se faafogafoga a Samoa ae tainane foi lena itu o le Maota, e foliga ua matou taliaaina o outou finagalo. Ia o aga lava ia o le tatou galuega, e le milia faauu upu o le Maota lenei. E oo loa ina faasoasoa le tamaoiga o Samoa, o lea lava tatou te iloa i totonu lava o le tatou nuu, e faasoa loa mea... po o a lava mea e faasoa o taimi aupito sili lea ona leoleoa ai tagata, ia aua lava ne i misi se faalumaga o se isi. O le mea foi lea o lea e faauu mai lava i totonu o le Maota lenei. O a lava tatou feeseeseaiga, o le a foi se sii ua foliga ua ta, a o upu lava a le Maota lenei, *e tetele a pesega ae matua i le oo.* O le avafatafata e iu lava i ai mea uma i a

tatou felafolafoaiga o fai nei. Ma e le laititi le galuega sa tatou alofaiva i ai i nai nei aso na tauaofia ai le Fonousu lenei a Samoa. Na mafai ona tatou ausia i le tauaofiaga muamua lenei o lenei tausaga, sa tatou pasia ai le Tala Faatatau Faaopoopo Muamua o le Tupe mo le tausaga lenei faaletupe o lo o faaauau pea 2019 seia tau ia Iuni o le tausaga nei. Na tatou pasia foi ma Tulafono Tau Faaofi e fitu, e fitu Tulafono Tau Faaofi ma uma ona tatou pasia, ua maea foi ona tatou lauiluina Tulafono Tau Faaofi e lua, o lea ua faasee atu i Komiti faa-Palemene latou te iloiloia. O le avanoa lenei e valaau ai le mamalu o le atunuu, aemaise foi le Maota lenei e toe oo atu ai i o e faaalua ai o latou finagalo, lea sa maua nei i a tatou felafolafoaiga nisi foi manatu foi e poupu ai pea atili le Tulafono o Faiga Palota ma nisi Tulafono ina ia toe foi mai i totonu o le Palemene lenei ua toe faaopoopo nisi tulaga au i luma e lelei mo a tatou faiga filifiliga aua le agai atu i le lumanai. O le faatinoga lea o le isi vaega lea o le good governance po o le tulaga o faigamalo lelei, e tataua lava ona i ai se faasoa ona tapa fautuaga a le mamalu o le atunuu, o le avanoa lea e mafai ona faatino ai. E le gata o outou lava o sui usufono o le atunuu lea ua maea ona outou sausaunoa i Tulafono nei a o lea foi ua toe faasee atu i o ina ia maua atili ai le avanoa e tou te talaaao atu ai i le Komiti faapea foi ma le mamalu o le atunuu o le a valaau e toe faaali ai nisi o teuteuga e moomia ina ia atili faaleleia ai Tulafono i se vaega lava ua laaloa ai le tatou matau.

Ia ma le galuega faaii, o le faataatia lea i luga o le Laulau a Fono a le Palemene Lipoti Faaletausaga e 26 le aofai o Matagaluega ma Faalapotopotoga a le Malo, o se tulaga taualoa ma o se tulaga taua tele lea o lo o tulituliola foi e au nei ma le mamalu o Minisita o le Kapeneta, Faalapotopotoga ma Matagaluega o lo o i lalo o le matou vaavaaiga, ina ia vave ona aumai ia lipoti Faale-tausaga o latou galuega na faatino, e silasila i ai le mamalu o le Maota, ina ia auiliili ma toe lipoti mai i le Maota nei.

E faataua ai ia le faatinoga o le galuega a le Vaega lea o le Tafatolu, Kapeneta faapea foi ia le afaigaluega uma a le Malo, ma latou omai ai i o outou luma, e auala i Komiti Filifilia o le Palemene lenei, e molimau ma tali atu foi i a outou fesili, ina ia atili malamalama ai, malama i ulugalu galuega o lo o faatino e lo tatou Malo. A i ai foi ni lape, e tou te aumaia i totonu o outou lipoti ma ni fautuaga e toe faaleleia atili ai. E leai lava se mea o natia, o le avanoa lena i a tatou Komiti, i a outou afioga i Taitaifono o Komiti Eeseese e tou te matua auiliili ai, galuega eseese o lo o faatino e le Minisita, ma latou uma o Faauluuluga o Matagaluega ma Faalapotopotoga o lo o i lalo o le latou faatautaiga.

Lau Afioga i le Fofoga Fetalai, 26 lipoti a Matagaluega ma Faalapotopotoga o lea ua faataoto i totonu o le tatou Fonotaga lenei. O le a faaauau ai pea ia a outou galuega tou te galulue ai faaauau, i totonu o Komiti, ae faaauau foi le galuega, a le Kapeneta ma le afaigaluega a le Malo, i le matou foi matafaioi, a o galulue foi outou i la outou foi

matafaioi, o le mataituina o le faagasologa o galuega, e pei ona lipoti mai ai i lipoti nei.

Lau Afioga i le Fofoga Fetalai, ia o le faafetai lena e avea ai au ma sui o le Kapeneta, ia ma Minisita Lagolago ma lenei Vaega o le tatou Maota.

Ma ou te faatu atu ai le lafo, *Ina ia tolopoina nei ia Taulumaga o le Fono Aoaofa Faitulafono seia aulia le Aso Lua 17 o Mati 2020, i le itula e 9:00 i le taeao, tatou te toe tauaofia ai.*

O le lafo lea ma le faaaloalo.

FOFOGA FETALAI: Ua faatuina mai le lafo, ina ia tolopo nei Taulumaga a le Fono Aoaofa Faitulafono seia aulia le itula e 9:00 i le Aso Lua 17 o Mati i le tausaga nei lava 2020.

Faaluaina e le Sui Palemia ma le Minisita mo Pisinisi, Alamanuia ma Leipa.

Na faamaonia le lafo.

FOFOGA FETALAI: Ia ua i ai le manatu ua faapena ona faafofoga ia le Palemene, faafofoga foi ia le tapuaiga a Samoa i le saunoaga a le Afioga i le Palemia. E faapena ona faamanino ai ia le agaga autu na mafua ai ona naunau le Malo ina ia tuuina atu ia nisi o tatou Tulafono ogaoga ia e pei o le Palota, i Komiti o le Palemene ina ia faapena ona maua avanoa. E le gata i le atunuu, ia ae o sui usufono mamalu o le Palemene ma so o se isi lava, e fesiligia ma fia maua le avanoa ma ave ai ia o latou finagalo.

Ia e pei foi o le tele o Tulafono e faapena ona tuuina atu i Komiti filifilia, i le tele o taimi. Ia ua saunoa foi le Palemia ia aua le tulaga o le tatou avafatafata ia ma le tatou soosootuli ia e faapena se lagona. E tetele lava i Pesega ae matua lava i nuu lelei ma le finagalo o le Atua, ia e manatu lava ina ia faapena ona faamalamalama foi e le Malo mea sa outou laga, ina ia maua ai se maninoga. E le gata i le malamalamaaga o le sui usufono lava latou, ia ae faapea foi se manino mai o le faafofoga tapuai mai o si o tatou atunuu.

Ia e ia i tatou lava ia le agaga o le faamagalalo, afai e tetele tai, ia tonu uta. Afai e tetele uta, ia tonu tai, a ia o tatou maua ia le agaga o le Atua. Ia ua maea ai foi ia le tatou galuega.

Ia ae tatou te le i tolopo, ia ou te tapa ia le Afioga i le Sui Fofoga Fetalai, e na te faaiuina ia le tatou Fonotaga i se tatalo.

Na tolopo Taulumaga o le Fono Aoaofa Faitulafono i le itula e 1:45 i le afiafi seia aulia le itula e 9:00 i le taeao o le Aso Lua, 17 Mati 2020.

